



南齊文紀卷第八

晉陽張焯叅定

閩莆余颺訂閱
江東梅鼎祚纂輯

江淹

字文通濟陽考城人仕宋領南東海郡丞人齊為秘書監兼衛尉終梁金紫光祿大夫○按淹歷宋齊梁天監四年卒在梁未久並無文績其集十卷齊時淹所自定故今屬齊

奏記詣宋南徐州新安王

子鸞字孝羽孝武帝子南徐州刺史

淹起家南徐州從事轉奉朝請

伏惟明公殿下列譽椒壁蜚聲冲漢爰求儒雅傍招

異人削赤野之玉翦燕山之金至如淹者東國之徒

步耳方歛影逃形匡坐編蓬之下遂遭煙露餘彩日

月末光惟恩知泰變色薰心淹聞齊石既撫無待巴
人之唱檀臺已構寧俟不才之木淹幼乏鄉曲之譽
長匱斤藻之德豈宜炫璞鄭氏獻鳳楚門哉願避職
吏緩其召書

到主簿日牋詣右軍建平王景素

淹由巴陵王右常侍轉右軍建平王主簿實侍累年雅以文章見遇見淹自序

淹乃庸人素非奇士既慙鄒魯儒生之德又謝燕趙
俠客之節徒以結髮衛次暫聞仁義常欲未辭冠劍
弋釣畎壑而身輕恩重猥奉末光枉白璧之惠降黑
貂之私因茲感激未能自反負金羈于淮吳從後車

于河楚竟不能曜丹雘騰英聲絕白雲負蒼梧至可
知矣不謂咸池再暉瑤光重照開高天之慈布厚地
之施承命以驚巡走且失淹聞古人爲報常有意焉
至乃一說之効齊王動色一劍之感趙王解衣孤心
迴槩有殞自天

被黜爲吳興令辭牋詣建平王

景素鎮京口淹又爲鎮軍參軍事領南東海郡丞時少帝多失德景素與腹心日夜謀議淹知禍機將發贈詩十五首以諷焉會南東海太守陸澄下艱淹自謂應行郡事乃用司馬柳世隆淹固求之景素大怒言於選部黜爲建安吳興令

淹本遷徙之徒非有儒墨之能亦以轉命溝間待殞

巖下誤得步修椳楯高軒伏層檻坐曲池承翠河之
潤降璇日之光載筆奉后盛飾立朝於山東百姓亦
已殊甚雖蓐螻蟻拭黃塵不足以塞惠而小人狼狽
爲鬼爲蜮山淵所容衣劔不貸黥赭幽圜皆非報責
仰遭大道之行草木勿踐輟鑊歛火炊魂拾骨濯以
河漢之流曝以秋陽之景叢然黔首豈不戴天竊思
伏阜九載齒錄八年以春以秋且恩且顧竟不能抑
黑質揚赤文抽精膽報慈光而自爲擁腫之異木卒
成踴躍之妖金所謂孽由已作匪降自天猶沐造化
餘靈宥以遐邑方蒙被霜露裏糧洲島缺鑿山楹爲

室未與鼃鼃爲群猶蹶者不忘起盲者不忘視况罪
溢朔方尚駐一等之刑各過朱崖猶緩再重之施金
石無知何以識答昔河濟荆吳必獲陪從京輔關轂
長奉帷席德音在耳詁言如昨淹迺梁昌自投東極
晨鳥不蜚遷骨何日一辭城濠旦夕就遠白雲在天
山川間之眷然西顧涕下若屑

到功曹叅軍牋詣齊驃騎竟陵王子良

宋昇明初齊高帝輔政聞淹才召爲
尚書駕部郎驃騎竟陵公參軍事

竊惟明使君鉞下道耀神源德鑄靈極誕涵天聽資
河炤聖譽拂宏外芳激震中故衡梁孕秀璿璣流品

變瑤光之暉贊玉燭之色功邁翊殷績起匡漢是以
赤瑕瓊寶之文睇影而夙集青亂遺風之乘晞光而
遠至如民者蓋不足筭所志不出繒販所學不遺祝
筮業異儒墨行乖曾史既乏脩短之術又慙啓塞之
辨不能伏軾躄衡驚燕趙之郊黃金橫帶馳澠淄之
幣語默罕緒圓方靡樹謬以一氣之微邀百載之會
躬奉英睿身蒙青牒故以潤厚累璧恩重兼金不悟
懸黎降景靈河瀉潤復獲執羈蘭陳迎笏桂序漏越
之琴竊莊文之價缺齧之劍盜須哀之名心羞秦勝
志慮楚犢抱魄踴躍憂集如熏鐫感何日銘報焉期

獄中上建平王書

宋建平王景素好士淹隨在南兗州廣陵令
郭彥文得罪辭連淹繫州獄淹獄中上書景
素覽書即
日出之

昔者賤臣叩心飛霜集於燕地庶女告天振風襲於
齊臺下官每讀其書未嘗不廢卷流涕何者士有一
定之論女有不易之行信而見疑貞而爲戮是以壯
夫義士伏歿而不顧者也下官聞仁不可恃善不可
依謂徒虛語乃今知之伏願大王鑿停左右少加憐
察下官本蓬戶桑樞之民布衣韋帶之士退不飾詩
書以驚愚進不買名聲於天下日者謬得升降承明

之闕出入金華之殿何嘗不局影凝嚴側身局禁者
乎竊慕大王之義復爲門下之賓備鳴盜淺術之餘
豫三五賤伎之末大王惠以恩光顧以顏色實佩荆
卿黃金之賜竊感豫讓國士之分常欲結纓伏劔少
謝萬一剖心摩踵以報所天不圖小人固陋坐貽謫
缺迹墜昭憲身限幽圜履形弔心酸鼻痛骨下官聞
虧名爲辱虧形次之每一念來忽若有遺加以涉旬
月迫季秋天光沈陰左右無色身非木石與獄吏爲
伍此少卿所以仰天槌心泣盡而繼之以血者也下
官雖乏鄉曲之譽然嘗聞士君子之行矣其上則隱

於簾肆之間卧於巖石之下次則結綬金馬之庭高
議雲臺之上次則虜南越之君係單于之頸俱啓丹
冊並圖青史寧當爭尺寸之末競錐刀之利哉下官
聞積毀銷金積讒糜骨遠則直生取疑於盜金近則
伯魚被名於不義彼之二子猶或如是況在下官焉
能自免昔上將之恥絳侯幽獄名臣之羞史遷下室
至於下官當何言哉夫以魯連之智辭祿而不返接
輿之賢行歌而忘歸子陵閉關於東越仲蔚杜門於
西秦亦良可知也若使下官事非其虛罪得其實亦
當鉗口吞舌伏匕首以殞身何以見齊魯奇節之人

燕趙悲歌之士乎方今聖曆休明天下樂業青雲浮
洛榮光塞河西泊臨洮狄道北距飛狐陽原莫不浸
仁沐義昭景飲醴而下官抱痛圓門含憤獄戶一物
之微有足悲者仰惟大王少垂明白則梧丘之魂不
愧於沈首鵠亭之鬼無恨於灰骨不任肝膽之切敬
因執事以聞此心既照死且不朽齊臺梁書作齊堂謂徒語憐察作憐鑒顧作盼國士之分下有矣字每一念來上有是以二字尺寸作分寸錐刀作刀錐利哉下有然字遠作古二子作二才如是作如此至于下官作如下官○南史伏死而不顧者以此也憐察作矜察民作人名聲作聲名次則虜南越作退則至於作至如昭景飲醴而已

報袁叔明書

袁炳字叔明陳郡陽夏人歷國常侍員外郎府功曹臨湘令淹為傳

淹出獄後尋舉南徐州秀才對冊上第轉巴陵王國左常侍按書去歲迫名茂才疑以時

僕知之矣高臯為別執手未期浮雲色曉悵然竟飛
前辱贈書知命僕息心越地採藥稽山友人幸甚去
歲迫名茂才冬盡不獲有報引領於邑情詎可及足
下推僕者不一二談也僕聞狂士之行有三竊嘗志
之其竒者則以紫天為宇環海為池裸身大笑被髮
行歌其次則堅坐崩岬僵臥深窟朝食松屑夜誦仙
經其下則辭榮城市退耕巖谷塞逕絕賓杜墻不出
然者皆羞為西山之餓夫東國之黜臣而况其鄉黨
乎或有社稷之士入而忘歸則爭論南宮之前衛主

於邪伏身北闕之下納君於治至乃一說之竒驚畏
左右一劔之功震慄鄰國夫能者惟橫議漢庭怒髮
燕路且猶不數而况于隣里乎若僕之行止已無可
言矣材不肖文質無所直徒以結髮游學備聞士大
夫言曰在國忠處家孝取與廉交友義故拂衣於梁
齊之館抗手於楚趙之門且十年矣容貌不能動人
智謀不足自遠竟慙君子之恩卒離飢寒之禍近親
不言左右莫教涼秋陰陰獨立閑館輕塵入戶飛鳥
無迹命保琴書而守妻子其可得哉故國史小官也
而子長爲之執戟下位也而子雲居之僕非有輕車

驃騎之略交河雲險之功幸以盜竊文史之末因循
卜祝之間故俛首求衣歛眉寄食耳若十口之隸去
於飢寒從疾舊里斥歸故鄉箕坐高視舉酒極望雖
五侯交書羣公走幣僕亦在南山之南矣此可爲智
者道難與俗士言也方今仲秋風飛平原影色水鳥
立於孤洲蒼葭變於河曲寂然淵視憂心辭矣獨念
賢明蚤世英華殂落僕亦何人以堪久長一旦松柏
被地墳壟刺天何時復能銜杯酒者乎忽忽若狂願
足下自愛也

與交友論隱書

淹少孤貧好學沉靜寡交游其自序云常慕
司馬長卿梁伯鸞之徒所與神遊者惟陳留
袁叔明而已為吳興令三載復還京師
值世道已昏守志閒居不交當軸之士

淹者海濱窟穴弋釣為伍自度非奇力異才不足聞
見於諸侯每承梁伯鸞卧于會稽之墅高伯達坐于
華陰之山心常慕之而未能及也嘗感子路之言不
拜官而仕無青組紫紱龜紐虎符之志但欲史曆巫
卜為世俗賤事耳而影然十載竟不免衣食之敗何
則性有所短不可韋弦者有五一則體本疲緩卧不
肯起二則人間應脩酷嬾作書三則賓客相對口不
能言四則性甚畏動事絕不行五則愚婞妄發輒被

口語有五短而無一長豈可處人間耶知短而不可
易者所謂輪椎分定也猶如雞鶩之有毛不能得鸞
鳳之光采矣况今年已三十白髮雜生長夜輾轉亂
憂非一以溘至之命如星隕天促光半路不攀長意
徒自欺取筋駑髓冷殊多災恙心頑質堅偏好冥默
既信神農服食之言久固天竺道士之說守清淨煉
神丹心甚愛之行善業度一世意甚美之今但願拾
薇藿誦詩書樂天理性斂骨折步不踐過失之地耳
猶以妻孥未奪桃李須陰望在五畝之宅半頃之田
鳥赴簷上水匝堦下則請從此隱長謝故人若乃登

峨嵋度流沙食金石讀仙經嘗聞其驗非今日之所
言也誰謂難知青鳥明之貴布筆墨然亦焉足道哉
敕爲朝賢荅劉休範書

昔媯道鼎昌干羽未能戢姬德昭宣長旌猶卷舒焚
衣毀冕有自來矣皇宋靈武誕命道鬱終三后連
光四聖沓軌或經天緯地構紫靈之符調風偃海隆
黃旗之祚莫不頌滿金石聲彰宇宙者也暨我太宗
明皇帝惟岳降聖重耀函夏延禮璧臺訪道衢室平
陽之后卷迹慙靈空同之君歛功謝德是以綵雲祥
風之瑞布濩區中梯山棧火之俗款徼請吏跨商軼

夏洗周滌漢道澤優衍猶不封禪遐靈在天餘惠無
泯主上文明金相穆然玉色履壁之禎獲珪之應著
在紀歲仁浸汙河惠愛秋草想亦君之所聞也重以
先帝靈略潛通英轡遠馭受話言必忠貞方肅之臣
奉風聲必虔恭匪懈之士明時琴瑟鼎鉉之盛且被
於寧世而忽覲來書以惋以慨君爲齊梁楚越之主
鼎貴一時金玉滿堂文馬千駟爵授湯沐冠蓋于道
惟名尊崇誰與爲雄而出言效尤吐音入戾舉旗類
社志竊神禁稱兵歛衆遂窺外關今朝無闕政頓構
凌上之節室無孽豎坐生莫大之豐鴟梟楮衣號興

徒黨主萃淵藪寧滋之甚不臧不軌不忠不義未有
若斯者也宗枝之釁遠則吳楚見禽于一壁磐石之
夔近則江荆面縛于小將此成敗蘭艾之鑒又亦君
之所知也聞彼虹飲鼠舞之異早見物徵河北隴上
之謠已露童詠所謂妖由人作孽不可逃然桓侯之
患良助寒心今羽林黃頭駱驛爭引熊渠飲飛首尾
電發伏波樓船掩江蔽汜渡遼甲卒充野布隰加以
先天蓋世之略蕩海拔山之威任輔沛陳羽林鷁舟
露動龍驤精騎風驅然後六師雲起九軍星連蜺旌
外江虹艦中水金甲映平陸鐵馬炤長原蹴南嶽而

求慨瞰九派而懷恐伐罪弔民復驗于茲甫刑三千
惟此爲大僕才等不羈志瀝丹款故奏禍福行矣悵

然袁褚劉蕭等疏

袁粲褚淵劉秉蕭道成明時上有脫句任輔沛以下至風驅亦有缺

誤○江文通集

爲建平王慶改號啓

竊以皇衡未謚則玉曆惟禎國慶方夷則繩澤式茂
故五鳳協年甘露應號况今道潤衍溢頌祉載繁嘉
生蠲慶風雲瑞節既覲昭晨方鑄昌化延守一隅無
以自屈不勝荒情

爲建平王讓鎮南徐州刺史啓

臣言臣誓惟殃釁頻寫曲折慊慊狂愚冀蒙哀弔而
聖旨懸嚴便驟斷表神垂意失音影何地吞悲茹號
情膽載絕臣荒昧神氣爰自幼稟分踰鼎貴秩高外
州臣乏素能或所不任况在憂年必取黜辱特爲開
非常之恩借權製之義紊禮滅經實翦治本臣又能
身祈命請一感天地躑躅表啓心容已覩猶疑大道
之行墨線不興孝治天下通喪獲遂陛下覆被仁明
品物無漏豈於微臣獨不蠲鑿焦鯁在躬縱復塵觸
伏願暫輟聽覽少憐苦草則臣死之日猶生之年臨
啓恍惚寃識無主不勝殞越怵息之心

爲建平王謝賜石硯等啓

臣言奉敕賜石硯及法書五卷天旨又以臣書小進
更使勤習敬閱籀篆側觀硯功張衛慙奇金瓊羞麗
臣夙乏翰能素謝篇伎空賁恩輝徒隆茲飾方停烟
墨永砥學玩仰結聖造伏銘私荷不任下情

爲建平王謝賜玉環刀等啓

奉敕賜玉環刀等五種珍噐缺伏蒙猥降飾軼采
朱跨影懸魄崑岡歸琛闕山慙寶謹襲緹素以充握
睇垂光既深銘佩更積不任下情

蕭領軍讓司空并敦勸啓

齊高帝以宋元徽初
平桂陽王休範遷散

騎常侍中領軍及蒼梧王見殺迎立順帝進位侍中司空錄尚書事

臣某言臣泐心之請丹識以傾詔旨冲挹便賜斷表

伏聞當遣王人猥垂獎勸仰天光休俯增驚厲

中謝

臣以爲槐鉉之任百王攸先具司是屬冠冕式瞻化曜昌輝連基政務事深崇替迹豫興衰故道富一時則風行明令才乏通權則山摧河泣既澆汨蒼祇將紊毀身國臣進退惟疑再三自顧實以陋情悲忘寵極但畏軼超疲伍乃參鼎軸無德而貴豈敢偷存才怯任重物所不恕故弱識褊槩頻布前辭枯木朽株永隔蠲恕豈特大車方塵小雅有廢而已哉將據致

寇之悔取鑒于茲矣且皇華之命居上之鴻私鳳舉之招爲下之殊榮國勲必書史不謬牘况臣連牧圉岳董率職方既鑠近古垂耀中葉揆望揣實爲泰已甚而乃復降朱輪之使方枉青冊之勸寤寐悁灼諒無以任輒重素誠冒覬神炤伏願皇靈特垂開愍賜停正台之職并缺光勸之使餘所榮忝誓不敢辭肅恭外屏祈迴恩授則於臣慊欵復爲惠造不任憂戴匪惶之情

蕭太尉子姪爲領軍江州兗州豫州淮南黃門

謝表

齊高帝立宋順帝二年進位太尉

臣公言臣頻結崇寵亟延上爵休恩動俗烈榮振古
鴻品清飾已藹金圖秀鼎號銘共茂瑤篆永言感慮
鑒寐殷心况乃秩洽朝門慶霑國珮弱息臣諱焜映
晃等文不昭典武不定功出內帷闡升降貂綬或振
迹領候職贊禁錡或騰光江甸任鈞屏翼河兗衝要
既濫北門之管淮豫險捍又謬西偏之寄兄子臣鸞
忝守近畿嫡孫臣某載華省闈皆倏忽晷景頻煩升
荷雖咸罄愚識恪居匪替豈足以少塞神渥裁酬皇
眷囂黷一盈慙厲彌積談天之辨不能爲臣陳辭雕
龍之文無以爲臣飾愧靜然肅念裴徊交集不任憂

感沐浴之情

並江文通集○
諱爲武帝名曠

拜正員外郎表

臣遇鄉遠迹由學未徒不瑩彫龍之采寧照玄豹之
飾自過被光私濫蒙恩幸屢度經冬亟移春序皇緯
如紐慙飛塵之效璿基方峻謝寒露之勤故宜伏影
軒間卷氣衡下猶蒙供事紫楹春役丹殿巡魄擎概
榮渥不晤震離徹邃阿景洞幽復升官清闈列版嚴
闈叢識何筭爰忝叔則之仕菲質焉樹乃謬仲容之
職猥枉青臚增光空質心據末塵情慙洞戶佇首矯
迹以銘以奏

拜中書郎表

榮爵兩臨恩俊交鏡悄然擘魂乃懼乃逝臣聞汝潁之金或揚采于四豪江淮之珠已馳光于七貴皆聲不妄美第豈庇立未有伎慙湘輿蒙送目之賞工謝綵輪竊歸風之價臣幼乏篆刻長睽圖史智罕効官志闕從政方遽永振風長 凌雨不悟遭社鳴之屬河清之會玄雲素霞必駕蓬萊白毳駢鱗咸蒙解遂仕通物任官登郎掾此實耀靈之私照而微臣之厚幸也仰惟皇衢大融氣品呈觀西傾棧山東鯁航海故竒士端威異人磬折皆相望北闕待詔南宮而臣願過爲信矣昔望都才麗爵乏上班長岑聞靡身終下秩愚臣方古悠然已泰內燭徘徊眇不識屆

建平王讓右將軍荊州刺史表

茂寵乃臨炫奪彝典巡恩鏡飾攬情震慮臣聞該秩詔序匪賢莫能孚其職端維裂陝非功無以濫其選所以輪鞅國典締結民紐五威咸平四精或訓者也臣踐行迷方試業敝緒徒以綴采宗孚承渥帝席執圭戴筆亟荷出內至乃曳組河縣蔑馴羽之化鳴環

京轂謝擇鱗之政聲績兩無風化雙缺而龜紐未剔
璽書頻降復改冊湘區分瑞衡服競無賈琮交部之
廉終乏郭伋并壤之信固以誼沓民明湫隘身諷不
悟皇靈再輝河海重渥遂踰恒采妄賁異等荆門務
要方城任積水交沅澧山通岷峨襟帶百縣縈抱七
州上德懋勲尠居斯地寧臣膠所宜膺荷是以焦薄
魂色驚迫心影謹刷睿情置露弱志伏願陛下停旒
弛琪暫炤瑣曲則鑄才式弘練物維遠王度既清蒙
識以泰不勝慙懔屏營之情

建平王慶明帝疾和禮上表

臣聞慶動至玄則昌衢敦序教孚上雲則紫寓交泰
故祈寒溽暑無以變其和沴火凝陰不能徙其氣伏
惟陛下至德遠稜實天縱聖仁鑄蒼岳道括寰海故
丹陵之君疑金泥而謝賢媯墟之后眷龍圖而慚德
頌聲蔽達歌思匝道而望景暫虧輪光少曖玉櫺達
和金幌輟念百祠未遑四嶽匪處吉蠲爲慶神御方
休瑞廣文齡祥深武日具惟涵教倡愉兼薦臣班戚
奉慈實自慶舞不勝悅豫之情

建平王慶安城王拜封表

麗采繩河映萼璿圃淑問夙孚令儀早晰撰告候辰

昭膺輝序國維富禮皇塗凝衛具生屬慶懷識戴躍
臣涵悅楚邊魂馳關闕不任下情

建平王之南徐州刺史辭闕表

臣過承寵靈閔黜假日徒抱皇慈無充橫草而品第
乃崇軒服逾峻顧茲醜窮彌覲荒昧今便奉官外甸
卷跡徐山託慕宸嚴載惟感戀衰疾不獲詣闕不任
窮鯁之情

蕭驃騎讓封第二表

藝文類聚作讓司空表

臣某言寫瀝愚丹已續前表猥降前詔未垂鏡恕一
省驚慙再悸魂府靜躬自察啓居匪地臣聞日薄星

迴昊天無以爽其節山盈川冲厚地不能虧其度豈
不靈鑄言限神極無失况世道恒淪人彘剽奪數滿
必公虛飾小故辭大臣才非古賢任鈞左戚祚開山
河兼金疊組爵多常班寵溢前達以榮以渥且慙且
醜雖嘉銘鼎之恭更懼循墟之速乃三司業貴上

將地崇摠錄務廣河汾寄深珪寓方啓劔衛增肅既
驚朝野足震城邑殷周富士猶難其人漢魏多才亦
罕兼職且麟閣之臣尚有位不及鉉全器之侯猶或
任不並台名爵無假前世之雄規車旗勿濫中葉之
英軌况鴻誥鬱集懋冊頓萃諒非虛薄輕所膺符今

殷夏既聲封國式固故天地輝耀日月更輝陛下停
若鏡之明流如雲之愛方求士于板巖宜思賢于屠
肆而私臣以闡廟寵臣以惟鼎位兼文武職摠內外
非所以發夢渭濱儲精河數鐫金刻石既不可詮輿
歌里頌其謂臣何仰緣大道方行蒼祇宅氣威靈所
燭九功咸詠寧於庸臣獨隔恩耀誓守愚衷重扣雲
日如蒙恩宥實生之幸不任慊欵之風

並誤

日薄藝文作日發屠作蜀

第三表

臣某言臣再抽慊請辭爲理屈測守圭漏伏望衷鑑

而震緯嚴祕懔懔徒懸優獎之降非復常旨肅奉驚
懼曠曉如失臣炤冊訪古訟史稽昔以爲敷道之寄
管物成務摠錄之重匡績毗風莫不下協河岳上踵
光緯先王所以長世後睿所以字氓讚金圖之要輔
樞曆之機者也臣本瑣姿不慕聞達昔值英世頻邁
時來感激光私未能自返烏可超乘厚任妄據高圖
天道既平鬼神好謙臣亦何人而獨斯處所以不恤
色忤頻犯鴻威者正以方圓之景已滿丹彩之色難
加政能緯俗匪務徇職坐而燮道必在其人若臣武
未燭韃橐之分文不諳樽俎之間德非時秀道乖物

宗虛飾疲伍空貽上位則天變彰于飛流地青見于
震壓驚蕩民聽蕪沮物議綸言之出不追金石之謬
已遠豈唯敗錦傷經毀鼎覆餗而已哉自非西京上
績東都名勳河右群賢江左諸彥寧有誣叨天爵以
爲已功者也昔南楚偏君鄢郢小政執珪柱國尚不
輕授况車軌同文四溟同宅而以鄙蔽超居金鉉殊
任鬱起臣心憂魄悚視丹如綠伏願陛下暫停冕纁
少察愚實鑒臣覲情愍臣孤志廣天下之惠可匹夫
之諒中則國步永清明下永無謬悞不任憂駭之情
蕭驃騎錄尚書事到省表

臣某言臣自妄蒙異寵輕荷殊爵晝昃猶聳夜艾方
驚誠以設器瑤陛取監冲滿懸魄金波徵驗虧闕茲
乃天數去盈人經好退后所以裁成萬品下所以各
慎百司未有達才易貫尅負求業者也且量力之誥
實炯前書辭科之誨且招昔牒况臣徒竭弱質忠貞
未懟猶叨令恩山岳非重故慙屬交喪頻煩表疏必
謂巡崖之慊不忽氣亮之清可期不悟皇明神邈鴻
獎彌深雖守丹愚競絕蠲恕今輒燿纓上序鏘珮中
軒德輕施重左右生華志盡輸謝終愧報效不任下
情

蕭驃騎謝甲仗入殿表

臣某言臣即日被敕賜給甲仗五十人入禁儀武殿飾冠疇典局此盛恩五情銘載臣聞國之利器在祀與戎蘭錡之設實允儲方故官騎辰居羽林天部瞰城龍塞言伏鬼方臣股肱之力不足以染丹青橫草之勤寧可以鏤金石而魚服象弭一旦虛授誕錫金珪方茲爲苟黃河如帶比金非賞故異寵之襲心魄共驚不世之服祇同輝雖攀靈河漢駿奔明哲慙迹駭衷無情以處

蕭驃騎讓豫州二司表

臣某言臣傾心駐氣不蒙睿感憂龍交鏡中寐再驚臣聞國曆惟耀則藩伯緝其才朝緯伊序則方率司其度用能璿紐弗虧民教可變者也臣自少器業無聞弘大誤變燕鼎超憑吳舟託翰負組假翼要瓊質圖玄素文寫青臚爵富諸公任高羣彥銓梁既失輻誦所湊雖仄影毗道苟身贊德朝微不昭民聽具溢豈非性力知限鑒度有崖乘茲而處猶懼紊辱之恥况此以任何堪湧溢之賜且董督條興皆非盛古至乃河襄初授或體兼上才江表廣任或功爲物首臣積陋於國不勤睿朝寵集若是非所尅敢終抱寸襟

重露思見伏願天鑄廣栽地靈厚載特垂蠲渥使不
矜盈則藿質蓬性庶無矯奪不任匪晏之情

蕭驃騎上頓表

臣某言伏見明詔鑾輿便御親六師臣又謬摠羣帥
竊聞金火告燿昏明代卷雲電漑湊經綸相襲所以
草昧縣寓昭晰區宙况乃逆徒阻兵器掩西服雖蟻
衆鼠竊勢必褫散然尋仍難貸原烟易滅臣受筭內
楹稜威外閫按甲視夕沾襟待旦翦此凶渠庶匪曠
旬但遂玉輅躬臨雲蹕親駕悚慨交心實百常憤今
便嚴率所統剋此月二十六日出次戎郊故已望江

源以軫歎想荆山而增厲矣進止之宜更聽敕旨不
任悚企匪寧之心

蕭驃騎謝被侍中慰勞表

臣某言即日侍中祕書監臣戢至奉宣詔旨慰勞便
受國中惟練甲外壘於麾蔽景輿徒競氣人懷秋嚴
士蓄霜斷晦竟已掩氛豎未懸稽鉞竚威寢興震慨
今王人臨郊皇華降庭輝燿望實將激威武戴鶡之
夫迎光喋恩投石之師攀炤竦惠楚續越醪方茲慙
潤臣忝屬閫私彌抱渥洽不任下情

蕭驃騎慶平賊表

文紀 南齊卷八
臣某言狂賊沈攸之棄天犯紀毀禮滅緯外陵南畿
內壘西夏龔龔涵氣咸百讎憤賴皇威遐制璿圖廣
馭四海競順其會如林仰綴宗稷之靈俯輯士民之
効故嚴校裁交妖鋒折首凱期既辱樂飲在晨斯乃
紫曆方永蒼氓同慶臣備符寵私時深抃舞不任踴
躍之情

蕭驃騎解嚴輸黃錢表

臣某言逆沴電熾凶妖霧舒志夫禋天情已類社故
乃馳羽江郊驚燧山甸雖藏智審其黠戮涵識判其
奔沮然兵扈難輕義險宐備故膺寵無辭奉錢不讓
今元凶既殪醜徒自紊稜靄方卷郢氛已廓樂瑄登
肆禮衣曳朝不宜復假殊服取缺彝則輒上還王府
永戢祕館

蕭驃騎讓太尉增封第三表

臣某言以鉉司崇貴袞位淵嚴非德非功無忝無溢
故誓魂肆請舒衷仰謁不能曲流茲炤遂乃徒洽恩
獎周覽未交靈爽以懼臣歷古公圖循遠訪繪未嘗
不麗選台衡妙簡槐采者也魯鄭之賢戚曹蕭之勳
彥吳鄧之盛功王鍾之素業孔明之居蜀茂弘之在
晉皆僉曰伊人是以處無懦色臣官逢昌世運漸時

明頻煩紫渥綢繆璿命身薄施厚感厲愈深遂負機
繩之託猥集衡梁之任風軌不澍微猷罕宣無以式
翦寇兆載弭姦義致虹沴阻于上京蜺妖扇于下國
寔賴藩伯鞠旅侯甸入守攬搶旬始烟祛霧卷故皇
道威稜之由神緯昭昌之効臣豈有探賈察幽之旨
攻城野戰之力哉今迹無小功事貽大賞愧寤終朝
慙夢流夜咨此庸弱何以任忝伏惟淮泗猶梗趙魏
未賓中原久蕪神州方翳思樂盛猷願厲聲頌將陪
雲駟以北守扈朝服以濟師乃爲少雪庸誠微謝天
眷耳寧容遽竊茂爵輕頒鴻名者乎伏願聖渥遐覃
賜以矜宥霈焉垂仁穆然惠德血祈旦亮懽志夕滿
雖蹈庇戾猶深抃躍

蕭驃騎讓太尉增封表

臣某言撰心求私精衷請亮情不感神理無動天詔
飾既降辭表是絕朱紱方臻金鉉未宥魄慮再馳詵
然改席臣局心久戰淺槩已領具煩寸管備黷尺史
曠旬浹景祈指遂宜猶謂設品分職實以仰銓壁緯
列寵懸榮故乃俯酌瑤陛迹聯盈缺道協興降上睿
所以僉舉前英所以詳能今若第隨私貴爵與私富
紊蕩經邦斷折民紀豈可還風中葉逖聽遐代者也

臣才乏往賢績謝古列妖鋒孽火將炎天地幸郊甸
或靜江山以閱文軒華劍既榮既峻侯桂食又盈
又滿祿高誚厚任重責深弱節兼誠誓思不淺伏願
隆慈特垂明愍臣奉國猶家慮公若私秉軸之鈞心
希在治不任懇懇之情

蕭驃騎讓油幢表

臣某言奉詔賜車一乘竊以國容方穆旗章式序朝
禮求清儀服咸貫故象革建鑣尚炯明圖朱箱玄蓋
猶炤漢篆皆旌羽勿差功庸匪濫臣忝爵山重蒙榮
海深襲恩祗冊已慙初筮浮祿素位方疚心路嗟古
以惕巡世固然不宜假文丹幘空飾阜輜仰思至道
俯恤物僭伏願聖遠特停華渥書愚上請追深累懼
不任下情

蕭太尉上便宜表

臣公言臣聞經邦緯治去華爲急體國守民循素乃
安聖誥遺風具騰丹冊賢言末流備宣青史何嘗不
翦削浮奢銷遣文繪然後頌音載興澤洽式廣楚駕
百馬民雜國彫秦修萬騎教亡業墜刻檣丹楹禮有
常序朱幡阜蓋古無濫秩縹衣綸綬漢置前制竒服
怪物周設常刑皆節俗約訓反樸還風肅政黎心釐

一民志故禮奢寧儉宣尼之高風以義止利孟軻之
宏規若乃文彩利劍道鑒其元彫蟲篆刻世炤其淺
雖儒墨異學名法各治至于遵本捨末其槩一也故
荀韓之立典君晏之制書賈陸之鴻筆嚴徐之博辭
食貨興志鹽鐵生論莫不異說而同儉垂議而共治
然世淪物起道缺事遷蓋源起西秦波被東漢一魏
不變二晉未革所從來者遠矣洎高祖武皇帝業高
懸寓化革區宙非躬謙度方追重華納麓之勤約情
撝操乃取文命卑官之義去金錦之巧無帷帳之飾
唯修遠圖綏國之術祈勸力耕濟世之規是以政平

刑偃紫階斯廓太祖文皇帝恭已明臺之上聽政衢
室之下九官咸靜萬績惟凝亦復務抑華詡思裁參
太輿馬翠翟之麗斟登乎外禁瑤碧綺組之玩罕設
於內宮故大德立而五路謐鴻名建而四民寧者也
自頃政教日替敦教月虧誰惟歷稔亦日淹紀至乃
帝臺傾海外之寶王城盡天下之秘象席珠履一躡
而即收鏤琴絲瑟再撫而已損褻衣隨塵而罷羅袂
從風而棄百民染其聲奢萬姓被其馳蕩故闐闐之
里富者竊梁楚之乘伎巧之家豪者襲王公之服於
是有文靡虛麗驕邪不典之器精織空飾妙蠱非常

之玩農夫勤耨不允浮伎之資蠶女務織無給點刻
之費將恐去實就華未知所屆背源從流不識其止
求國富兵彊寧可得乎今江南所宅正漢魏兩州之
地戶口所檢裁文景三郡之民舊齊故魯鞠爲茂艸
全趙盛魏豺狼所嗥陛下方欲鳴鑾中土朝服濟河
不改斯術則未見其可也臣謬屬大任竊同憂泰日
晏宵分實忘飢寢草治其莠職此爲先輒具條便宜
可以安邦利民者事事如右率以聞見謹簡聖聽若
其咸允謹請敕付外施行

讓太傅揚州牧表

崇絕之寵降自白日殊甚之禮墜於青雲祇畏驗盛
若奪魂鑿巡席無容當軒改色臣聞天地之大德曰
生聖人之大寶曰位將以啓廓靈緯崇樹神紀百司
備列貴賤之分既炳九官咸贊升降之際可明故皇
極不爽國步斯泰雖金媯各政姬華異治未有革序
變倫而能流英發耀者也臣才慙右賢功媿上烈平
趙夷魏之氣無宣於國書濟河登山之威未亮於左
史既罕龍韜金匱之効又乏楹間帷中之績衛主寧
謂提橫流匡危不足生細民故小節明顯于艱難大
勲無紀乎廊廟而乘輅服冕荷蕭張之賞開城裂域

受曹鄧之爵不能翊教緝政釐濟氓隱贊邦弘化飾
整朝輝是以德少寵多與人立規才薄位厚處士與
議故玉燭未調道治猶鬱者臣之爲媿也不悟陛下
復停日月之華凝烟露之潤擢臣瑣姿鑒臣陋誠前
恩未曠後寵已襲上公祕鉞聲振都鄙文劔彫弓禮
殊軒殿深褒之逮方今爲絕大賚之降比古爲超臣
亦何功當處斯忝伏願道邈先帝理鏡衆寂被氣順
方涵生獲慶特輟策書時停鴻冊則人歌僉平物抱
至歡

蕭重讓揚州表

臣某言臣以功狹賞峻世誥所譏才弱寵隆道經所
講故寫魂誓膽庶留天矚圖驕慮滿護守私吝不能
青蘋引風陽燧要景復降綸冊徽采兼明影迹交戰
冰烟相薄竊聞周夏異章玄素各禮儒道二宗名墨
兩教咸以裕俗爲急僉以得人爲寶於是尊官上品
乃貽玉振之賢鴻等懋列爲取金聲之彥或有濟世
夷難之略輝燿內氓導江疏山之勤纏結中寓深德
衍溢大功振驚然後超居國右鬱處朝端故九職惟
宣六典式序丹青所以傳其藹馨管所以揚其音也
臣才蔽識淺非集譽於鄉曲榮降寵臻乃假翼於皇

極遂事等話言之寄任鈞符負圖之重職摠表裏地
聯機務位班昔良知闕前修居官不聞其風處秩焉
見其政寰域之治未緝街縣之訟方興繒販之士無
薦管庫之家寂寞四維不闡五教罕聞安可以底慎
財賦交正庶士者也今輟和毗道仄身贊業尚據晦
撓獲蔽璇圖况異禮更飾褒命復從名超列辟爵擬
羣后上仁居之猶涵慙德臣實空儒伊何以勝既誣
人文將黷玄緯凌歷飛流之肯懼失正和晦裂蜺霧
之災且濫庶物臣是以寤寐永歎憂國慮私者也伏
聞陛下裁天賦品制地平施使曠世之典不遂臻于
末躬迴代之軌無頓被于茲日素心丹魄皦然靡疚
矣不任憂迫之情

後讓太傅揚州牧表

臣公言臣再辭非謙重讓靡飾實以爵高中世歷古
所難寵冠上俗縣代誰易詳圖辨箴如鏡如水撿崖
覽志匪彫匪文覓祈夢請駐心挂氣陛下猶降以璽
書之榮被以丹碧之采頓然變容一慮九逝臣以爲
寒暑繇乎平分晦明辨乎天道咎譽起于微薄得吝
生于小疵故金衡既陳錯髮之異必懸銅墨咸計分
撮之殊已傾聖哲不能爽鬼神莫由避况臣鄙槩早

盈陋才久溢第超庶后禮絕羣班仰贊東序之賓平
參北宮之政窮盈極滿於斯爲甚鑒茲降替淵冰非
譬所以坐洞房而不悟下輕帷而歎息也古之馭教
當有道焉量能而受賞撰智而錫位深乃裂組遠故
分珪前人以爲稱首昔人以爲美詠自非上德橫乎
天地高績格于區宇烈譽馥于一時茂名鬱乎當世
者豈有降今日而莫先哉臣爰蒙殊寄六稔遂交及
荷摠任二曜忽周末能塞謫生民獲免童訟何盛勲
之足題詎深烈之可銘乎而因委忝濫踰溢倫等朱
軒躍馬光出電入貂冠紫綬寵藹霞炤臣聞闔宗奉
國猶非報殉方將身侍鑿華雪齊魯之侵地手執羈
勒驚燕趙之遠郊然後追迹范張濯纓汾射臣之志
也華爵盛典非所敢寧伏炤右巡將流聖察無使匹
槩血誠不諒於璿宸宏芬英猷遂蕪於里聽豈伊庸
臣猶去其庇亦曰海隅咸被其利焉

蕭被侍中敦勸表

臣公言即日侍中臣惠基給事黃門侍郎臣王僧珍
至朱蓋乘雲玄軒肅霧墜高天之旨集微臣之軀神
爽懼然斂影無地臣初長血心未啓素槩辭從意空
言隨事盡不能降陛下一時之恩借俄頃之炤遂枉

近侍貂簪軾庭臣自亮無庸何以集此退咎慙誠悲
枉垂光進誠朝訓虧茲盛序感慮躑躅榮結夢寐臣
檢古少例巡今逾疑豈有妄叨天功虛竊上賞近謬
國華坐取隆貴人見其過外惜皇猷內畏私青昔西
京鼎秩漢世權家丹墀網戶擊鐘連騎何常不以驕
滿貽戾謙冲要福者哉臣不能遵烟洲而謝岐伯迎
雲山而抑許由激昂榮華之間沈潛印組之內光飾
既超寵靈亦遠江左以來罕見其倫今位冠朝端通
侯萬戶結象弭于前衝奏金管于後陣都野宗其榮
盛視聽敬其炎貴臣一旦居之誰以爲不忝者乎而
陛下猶崇以異禮者是增臣之戾也况復肅延華勸
實深窘迫伏願俯矜卑志賜遂前請則世寢橫議臣
蒙緩責

蕭被尚書敦勸重讓表

臣公言臣五寫丹翹宜蒙凝炤一降王人遂無蠲察
復遣尚書臣忝兼侍中臣奐等奉宣慈靈重賜勉誨
鏡伏迴環憫默失圖心鬼交懷淵谷匪譬臣自初被
詔迄于今時載慙載疑以悚以厲豈非深懼鴻典永
憂末躬故琴瑟徒鳴不傳廣樂之響燈燼空舉焉續
經星之耀何則卓乎小者不足以任大守于蔽者不

可以語通臣噐乏淵源識暗機務倫濟夷險每憑璿
曆之遠龕折氛蜺輒資羣才之効臣寧有採竒鑿隱
之能網國提民之功乎不謂過延渥洽謬攀河漢榮
宗蓋益寵華暉映藉聲採議共知其幸况傳保之崇
殷周特貴牧司之寄魏晉稱重上昭妙德次擬英勲
有踰茲序尠不紊裂今陛下方闢金門之聽調繡屐
之政何得去禮廢雅近於臣始既無前章孰表後世
臣才孤位峻待罪無日矣情哀理感事盡于斯伏願
一運天景微見藿心則物不逃形臣何恨焉不勝焦
憂狼狽之至

蕭讓劍履殊禮表

臣公言近仰跼威靈辭移理奪故欲冒忝傳識必避
殊禮不悟復凝令詔雕飾非常鏡睇未周金火交慮
臣聞寵以昭賢不濫才外之華榮以麗身豈謀分表
之渥哲后所以僉授貞臣所以慎荷故行珪行玉尚
無輕頒一爵一號猶宜詳品况劍舄升陛贊唱異儀
殆爲對越神體抗禮天極漢魏舊載唯斯稱重雖英
袞造朝賢武滿世蒙此典者乃曠古時降耳諒由功
饒賞結名高噐深金蟬綠綬未不藹其采瓊珮朱紱
不足宣其榮方加以此殿優以勿趨至第爲上公

貴爲皇王佇望慈禮猶邈如也臣荷燁業兼昔人
且今所慮受以懼覆悔豈復聞殊旨增其憂迕抱此
愚款以殞爲請伏願天鑒順臣所守則雖歿九幽傳
榮萬葉矣

蕭拜太尉揚州牧表

玄文既降雕牒增輝禮謁前英寵華昔典仰震威容
俯慙陋識心覓戰慄若殞若殞臣景能驗才無假外
鏡撰已練志久測內涯故讓不飾迹辭非謙距守亮
八素頻觸瑤纒丹誠實理備塵珠冕而神居寂阻九
重嚴絕徒懷漢臣伏闕之誠竟無魯人迴日之感所

以迴懼鴻威後奔殊令者也既而永鑒隆魏緬思宏
晉國之大政在功與位故民紐亂不處輿臺之下
去勳捨德寧班袞司之上咸以休對性業裁成噐靈
詎有移風變範剋耀倫序者乎臣績不炤忠豈宐國
名爵赫曦僂俛優忝陛下久超以異禮之榮越次殊
常之秩雖寢寐矜戰曲垂哀亮而壘冊冲正愈賜砥
礪今便肅順天誥恭聞睿典審躬酌私必跋危撓將
恐氓俗由此方擾軌訓以之交蕪臣豈不勉智罄忠
也未知所以報奉淵聖輸感霄極取諸微躬長爲慙

荷

文記

南齊書卷八

三十一

蕭太傅謝追贈父祖表

臣公言即日兼謁者僕射

姓名

奉宣詔書追贈臣亡

祖某太常卿亡父某爲散騎常侍特進左光祿大夫
寵煇泉扃恩凝松石奉渥銘心祇光慟慮臣行阻祇
玄躬早荼棘如創之痛晷日不追終身之恤霜露彌
感雖慙曾輿喬木之敬實抱仲路華袞之哀自謬藉
珪金空貽組紱爵侈于公祿盈於私何嘗不靜歆其
結默慕交深不悟睿孝動天昭性曠古惠被遠紀澤
演慶世丹請靡諒峻冊愈凝大榮焦身尚驚異施况
龐洽山拍特振殊造銷骨瀝命猶不勝謝不任顛泗

荷珮之誠

蕭太傅辭輿駕親幸表

臣公言近以神輿將降昌啓丹辭重被還旨未垂閤
允謙尊彌光褒優愈臨慙疚既積敢忘謙請臣乘幸
藉私豈曰無僭攀霞鏡月非復常所此必讓德信在
於茲但恩嚴交洎固守莫從免默恭典伊榮加戚寧
容爰枉鑿駕式驚臣府訪心驗已諒以不夷求物較
迹誓無此義且古今異飾紫青變禮取諸臣躬未覲
其安伏願陛下賜止冕輅時停雲駕則俗踐知方臣
蹈厚泰

蕭讓前部羽葆鼓吹表

臣聞國容軍禮旌羽昭其華品騎第乘鸞旌藹其飾所以炎曜仙都崇麗神境世教以之垂采民聽以之流文故勒岫銘海之功鞞革寫其詠龕難夷邦之業簫管凝其聲朱鷺玄雲既錫上德華山芳樹以頒竒勲爰及台賢位高蕃戚名泐恩炤寵垂私賞皆爲發吹後陣豈曰兼奏前軒茲典罕行此禮實曠臣竊服已弘叨光無限才局秩遠常銜炯燿安可二葆同整雙弄頓驚覽躬惕然特貽厚謬伏願明燦日月靡忘情鑒將停盛飾遂臣慊心則涵惠既饒恭錫多矣

謝開府辟召表

臣公言近被詔旨賜令臣府自辟僚賢竊聞治以才爲寶教以人爲貴激風揚旌賓資山東之英凝華重馥良在關西之彥近以闡耀世經發麗朝序今州策郡聘茲理尚堙台召鉉辟斯文亟曖豈非盛美難嗣故曠寂先芬者哉臣謬贊國機職宜水鑒未能澄刑

招藝薦品任官既垂覆業彌感深寄仰屬

皇心遙

察政洞俗弘此懿典崇臣遠寵輒祇睿恩謹宣巖壑庶幽居之士蘿薜可卷竒武異文無絕於古

蕭上銅鐘芝草衆瑞表

臣公言臣聞象際懸通豈以明昧咀運幽岸遙鏡不以人靈異謀威書壁誥既信其絲綠鱗丹字彌驗其文是以業藹鴻經則煙露呈炤精昭景緯則川岳發華故寶鼎白雲瑞集軒世芝房赤鴈祥委漢年玄石鴻鐘遠炳晉室玉璧彝器近燿皇宗自火明乘規秦始豐矩朱髻素毳之至史不絕書奇葉珍柯之獻府無虛月今懋曆啓圖靈基再固頃歲以來禎應四塞近獲豫州刺史劉懷珍解稱所統建寧郡建寧縣昌村民于万山中採藥忽聞異響從石上得銅鼓一枚長二尺一寸遠像古鑄近垂今製又州界之內樹生

連理二木隔澗滕枝相通越壑跨水合爲一榦方之舊說彌復爲貴宣城所統臨城縣山中獲草一株交柯攢莖紫蓋黃裏貞潤曄曄自然天華採掇歷時質色不變闕此三字柄據有徵近獲吳興太守臣王奐云

十一月二十九日解所統長城縣令臣張撫解稱其月二十五日甘露降縣東界下山之陰又東太守臣腦解所統武進令臣紀法宗云十一月十日解稱其月二十四日甘露降于彭山松樹至九日又降如初臣以祥緯雜沓星燭波連斯乃靈迹深覃睿衷夙感理宜寫順祇無涵秘稽往徵古僉欣升泰瑤光日闡

玉繩永休謹拜表遣兼長史叅軍臣姓名奉銅鍾芝草以聞懸通一作玄通

蕭讓太傅相國齊公十郡九錫表

備九錫之禮非常之冊分天而降冠古之典開河而出遙然以慙魂交象魏臣聞日月權輿二儀所以尅靈君臣設極三統所以式固惟生與位謂之大寶辨諸文而尊卑既炳觀羣龍而貴賤可正雖復殷因於夏王資于帝至乎建侯分職體國經野其揆一焉是以二周之始山河愈廣兩漢之初封賞彌盛然表東海者實牧野之日瞻魯邦者乃負圖之辰西都英相

信命世之功關中上宰亦龕亂之力秬鬯彤弓本西伯之賞虎賁戎路又晉公之典若乃衣裳之會九令一匡猶慙德斯禮也臣實鄙才靡識大體徒以忠貞為槩而勞不足銘雖以丹素為誠而功無可勒豈有經天緯地之略探隱炤寂之智哉抑亦何術以堪盛休是以寬雲際而懷古憑軒幌而未寧也伏惟陛下神華馭世理無不鏡賜臣待謗今職守其私滿則天下有道庶人不疑矣

第二表

臣公言臣近勵心罄辭寫情畢議眇望神藻鑒見丹

襟而帝閣以秘論誥方明中庶卷容左右軫慮臣以
爲麗天秉經君上之彛憲儀地執緯臣下之恒軌故
皇極載凝庶士交慎昔者重黎勤官裁居炎冥之職
羲叔能任方掌日月之序至乎御龍勤夏未聞冠俗
之爵大彭翼商豈見超世之典以古先哲后如茲之
慎賞也臣乃謬貽國寄志在靜難若夫野戰虹蜺伏
順者易爲威城攻黥虺奉國者理必全雲氣薄蝕下
民咸貴其明恃險輿馬舟中皆可異議故昌邑有歸
邱吳楚無旋師斯激芬揚麩物同其幸焚惡去醜世
共其庇實爲仰憑俯順之効臣亦何力之有焉竊謂
祿爲十郡必俟禹迹之勤錫以九命乃須周公之美
况呂梁不鑿而噐重玄珪越裳未獻而賦擬千乘京
關識其崇貴畿服知其忝冒鏡前修而慙形覲往德
而聳慮畏崖之請取誓深水審量之祈呈炤皦景伏
願陛下遠牽雄範近覽英規憑霞停詔臨風輟恩豈
伊愚臣方獨昌化具日遺氓咸蒙其賴矣

被百寮敦勸受表

臣公言臣欵誠素履頻載纁翰天飾高獎累降史筆
即日尚書臣某等至重宣詔旨猥辱百僚省睇未交
心靈已悸臣聞良宰謀朝不必借威貞臣衛主修已

則足故驕滿之失取鏡函關謙讓之美見炤伊闕臣
本庸人識無遠度籍開闢之辰遭櫬搶之運姦回內
罌則戮力瓊都諸侯放命則抗節瑤祀秉號伏羲幸
不辱威皆爲冕旒遙鑒之明羣士盡圖之助臣寧望
伊摯叔且之爵呂牙申明之賞哉方欲謝簪東都濯
冠汾陽不悟盛禮華典復臻于茲靜默廻環祇畏躑
躅猶謂遇聰明之朝當時雍之世陛下詠堯風之化
歌卿雲之詩日月華采萬方獲性叠慮仰祈必蒙題
品而威嚴窈絕斯冀遂阻鑿輿玉駕復許敦幸重臣
愆悔無地自安便當謹恭鴻命竭身爲限

蕭拜相國齊公十郡九錫章

殊命寶典鬱降雲天采詔軒騎光流城禦震驚華禮
神氣交越臣才謝深英噐慚遠度進寡兵車召陵之
盟還靡朝歌河內之會無束馬山戎之績懸車流沙
之功故望寵未安踐榮加懼况納陛朱戶事絕羣班
金璽綠綬儀叅鴻典聞命屏營以憂以墜近申微款
日月之鑒既阻方懼難慊蘭芳之旨愈峻遂致百辟
卿后踟躕于魏闕鑿輅旂旂方幸于臣府悵然遙慮
將貽厚戾文章徒单迄無蠲省而天威咫尺丹懷罔
固輒肅恭文物翹拜榮禮違距以深追憎怵迫德輶

寵盛于斯爲微非臣鄙虛所能酬對

蕭相國讓進爵爲王第二表

臣竭慮歸請三辰未鏡傾魂仰視亢天彌阻重炳微策再錫光誥理晦情震若涉嚴淵臣業不出世績未逮古謬藉明政陳力就列艱多智寡翊贊罔樹若乃洪範不修鍾綴旒之日九黎亂政當摧軸之辰雖瀝命奉時蘭禍提下亟防明之陋貽慙昔人杜險之蔽取愧前英故十萬之師無集橐行之邸千金之貴恒單白藏之府戈船發於江湖戎車出于石城然後雲徹席卷虔劉巨禍臣實慙焉不寤上賞亟降華爵必

集雖延首紫局翹意宸居執爲守約之志既謝簡文避賢辭智之請終無開允故受任專征遠邇知寵肇封四履侯甸推禮昔虞思勤夏不列殊物之錫晉叔匡周豈頒上公之典燕藩懿親裁蒙袞舄之榮梁國戚屬方忝旌旗之貴而臣包括庶揆摠納儀形蓋出近古非三代之遠體也公復乃踰九命爰超五等域中之稱麗天作則探情顧抱豈所允安者哉伏願陛下下一檢丹崖遂臣懽心無使怵迫深貽庇矣

蕭相國拜齊王表

臣無佐夏匡殷之功威晉服楚之績業不題于宗器

聲靡記于彝典而超居上禮邈乘峻爵靜念隆替焦
原非譬臣以爲衆官咸事帝謨所以式序羣后克讓
王猷所以載穆况臣訪德語勤未泊伊稷之能藉靈
懷寵以濫周召之秩故駐冕仰請瀝意歸聞理竭素
牒事罄丹史具微太微備簡玉繩而才輟志淺隔景
絕炤朱輪之使日月亟紆金鑿之尊旦夕將拂巡情
覽識豈伊寧處今便肅典內軒恭服外屏大夫有命
古或無違王假有廟今臣爲叨三省空懦震據于心
齊王謝冕旒諸法物表

臣王言以軒冕雲蹕既非常之飾宮懸玉戚乃配天
之禮故呈襟効慮必祈蠲亮重被還旨芳訊愈越鏡
伏殊私情影遠震昔大啓營丘未備樹羽之賞光宅
曲阜始兼龍旂之貴况道狹慶隆身薄器尊扮墜爭
輝燥火鏡耀夫太常圖列星之采華盖觀古人之情
所以聳絕百縣崇隔萬寓鳳閣因此而神瓊都由茲
而麗故愧功慚德違儀避 誠不遙孚理無負達遂
貽嚴誥爰斷辭表驚慄遲廻祈鑒何地便當肅對王
休敬昭異寵佩服盛文以慨以懼

齊王讓禪表

遠規唐虞永揖之典近謨漢魏高樹之禮既覽金水

昏明之數又協雲電隆替之徵激風太上扇采至公
 聞命驚爽心靈殞越臣聞天地草昧而樹之君所以
 平對二儀顯臨萬國膺符受曆摠明司幽軒轅陟祚
 首出庶物顓頊登庸作為民紀雖五德迭興十代繼
 運非賢非睿莫預斯位若乃與能之交禪錫之會豈
 伊虛薄所可尊擬昔傅巖佐商秩終上公磻溪翼周
 名極列伯臣才非若人功愧伯聖獄訟不往謳歌寧
 歸河乏馬圖之寶天無乘龍之錫元首股肱誓不可
 異而曠棄之軌忽臻于茲慙慨憂灼罔識其際伏願
 陛下貴舜禹之心臣守巢山之節則道耀日月澤浸
 飛泳聲振開闢仁動今古四三王而六五帝不亦休
 哉

江淹二

始安王拜征虜將軍丹陽尹章

既擢軒禮涵藜龔恩爽泗醜默臣少識臍而哀辛方
 葉藉以毓采上霄博華中漢飲惠恩光而爵假息不
 悟瑤離降耿繩河低文廷胡言國言使弟亦部進憲
 蒙淺塵素徒盈選迷懷依風裂罔樹俯伏憂秋滅虜

南齊文紀卷第八情

中齊文辭卷第九
 雷隆替之徵激風大上扇采至公
 聞命驚爽心靈煥越臣聞天地
 平對一儀顯臨萬國應符文
 首出庶物顯頌登庸作
 通非賢非睿英預斯位
 伊虛薄所可尊擬昔
 名極列伯臣才非若
 歸河乏
 造
 蘇宋
 今古四三王而六五帝不亦

南齊文紀卷第九

遼東遲日豫參定

閩莆余 颺訂閱 江東梅鼎祚纂輯

江淹二

始安王拜征虜將軍丹陽尹章

既耀軒禮涵蕤龔恩爽泗醜默臣少識猶晦哀辛方
 襲藉以毓采上霄搏華中漢飲惠延光倂爵假息不
 悟瑤離降映繩河低文遂翊言關禁徒弟京部進憲
 蒙淺塵紊徒盈還迷懷悚風製罔樹循伏憂歛滅虜
 焦衷不勝荷佩之情

始安王拜征虜將軍南兗州刺史章

絢服騰炤懋冊凝芬夤對迷墜慙泣交集臣職右南
謝蒲鞭之政任重臨淄無遣獄之化自分金帝關參
風尹訟壁緯裁復圭露詎淹不悟旻靈拂采霄景汰
色復交書河楚置傳江吳環章清潤旂文肅路寵艷
內維榮炫外圍方梗名慮有陋莠識冲生覩氣安以
翰謝不勝荒震屏營之情

建平王慶少帝登祚章

上書皇帝陛下伏承肇嗣天震雲飛璿極戎夏歸服
民靈以戴臣聞黃旗紆藻瑞益於姬帝紫雲垂蓋効
異于劉后實乃深賜天衷廣映祇迹伏惟陛下騫英
駕聖涵靈蹤睿矩心明裁繩道詰時遙裔雜符雜沓
河紀是以膺符寶宮輯命珍殿誼洗雲密德徽媯夏
濬發洪源長褱鄴緯方絢聲金圖騰華玉曆波滄下
珉炎躔上漢臣泐莠締寵誠兼親屏禮升之日守官
楚甸不獲勉躬儲外奉敬行間魂泣江郊心泫京國
不任哽慰之情

建平王荅王太后正位章

上書王太后殿下伏承以今日淑辰曾光樞景慶芬
祇外禮蔚寰中臣聞道懋弟昌鄴廣祉盛藻秩攸臻

憲章斯飾伏惟殿下柔明固天夙資龔懿芬蕙翔聲
端簡散譽冠采摯妊騰燿徽姒丹陵蘊德玄丘棲聖
煙熅國牒衍溢民聽涵道席教且泳且洽臣忝任蕃
圉無由隨例闕廷不勝荒情

建平王慶江皇后正位章

上書皇后殿下伏承以嘉月蕙時膺曜宸正翠珩炤
品榆組在飾休遍函夏譽殷靈昧伏惟殿下岳曜靜
德式懷謙順升降圖傳左右詩史夙鏡茂資早摛芳
訓故以騰馥祕閨寫問中惟今靈緯載升崇正輝典
衛教紫庭麗軌華屋聲激綺組風偃家邦黎玄淡仁
雲祇宅慶遠邇有聞莫不傾渥臣限外任無由恭列
軒屏不勝荒情

建平王拜右衛將軍荊州刺史章

珪冊停徽車旗寫曜襲禮炫衷迎恩震色臣聞爵以
能委命以績降亦有玄雲結吹褒成燠之厚朱箱累
轍崇試宰之高而臣紐組頒守要玉備政績廢江區
聲溢河部浮榮曠年叨光矇目諒以具察輿歌取鏡
民誚不悟皇德至凝亭物帷幄復使承官楚封祗秩
漳士任班河翼事亞嶠陝橫術輻湊殷氓訟積寧曰
明哲疇剋勝寄雖歷丹局終懼蒙咎不任銘戴匪處

文紀
南齊卷九
三
之情

蕭領軍拜侍中刺史章

上書皇帝陛下即日詔書以臣爲侍中驃騎大將軍
開府儀同三司班劔三十人等持節都督如故峻命
在廷光冊充軒虹駟聳服朱曦佇蓋夤對以懷心影
若傾臣功乏至道不足以題象魏績非振民無可以
書廟閣半漏未晏中鐘而驚實忌微庸起乘盛服竊
疑國寵頓萃末躬今寰海順典瓊都咸光調御惟新
鎔製就始良宜整變獻經詮明典緯九河式耀三辰
載晰不悟陛下皇靈曲溢大賚斯降而鴻賞之行乃
於臣始非所以騰振遙風激昂品流輿人之誦具聞
其黷頻露慊祈未阻鑒順今使虔禮青軒謹躬丹墀
憂符怵惕慙屬兼軫不任屏營之情

建平王散五刑聘隱逸教

府州國紀綱吾謬繼朝組乃班恩命重渥華蕃踐寵
懋甸未言政惠良攬情寐况舊楚地曠前郢珉殷水
帶枉渚山匝魯陽自頃田邑榛故封井萊蕪財賦方
屈犴獄寔繁思所以厚風釐俗變瑟改調自五歲刑
已下未連臺者一皆原遣文武彈坐亦悉復職主局
依舊施散薄紓此懷

府州國紀綱夫媯夏已沒大道不行雖周惠之富猶有魚潭之士漢教之隆亦見棲山之夫迹絕雲氣意負青天皆待絳螭驤首翠虬來儀是以遺風獨扇百代餘烈激厲後生斯乃王教之助古人之意焉吾稅駕舊楚憩乘汀潭挹於陵之操想漢陰之高而山川遐久流風無沫養志數人並未徵采善操將棄良用慨然宜連詳舊禮各遣纁招庶暢此幽襟以旌蓬華

蕭驃騎發徐州三五教

州府紀綱沈攸之背慢靈極稽誅之日久矣况稱兵江漢之上圖豐廟闕之下惡熾罪盈民靈所絕朝廷以尅晨纂嚴令輿夙駕吾任先責遠義兼常慨挺刃投袂信見其時方當水斬龍蛟陸斷犀兕雖烈士銜志壯夫投槩然雲羅既舒宜廣威防所統郡縣便普三五咸依舊格以赴戎麾主者飛火施行

蕭驃騎築新亭壘埋枯骨教

府州綱紀夫汝南稱慈諒由掩齒廣漢流仁實存殯朽近築製茲營崇堞峻澗古墟曩隄時有湮移深松茂草或至刊薙憑壙動懷巡隍增愴宜並爲收改毀奠祀主局詳辨施行

蕭太傅東耕教

三府二州綱紀夫寶農賤貨綵炤周騰巡耕去販光
炎漢錄故能業滋都野產殷絃縣吾任屬弘寄思闡
治源慮以晨感情以宵嘆今玄司調氣青祇佇節陳
闕既柔服闕方秀電爍有期桐萌無遠便當躬速紺
耦道先列辟事均暫勞迹在未豫可剋日備辦詳典
施行

爲錄公拜揚州恩教

昔召南分陝流甘棠之德平陽好道深獄市之寄吾
忝屬負荷任總侯伯受餞元戎作牧中甸此地五都
雜會四方是則而向隅之矜斯積納隍之歎猶繁興
念下車無忘待旦有齊禮導德致之仁壽弘漏網之
寬申在宥之澤

遣大使巡詔

門下昔明王馭世巡嶽采政睿后司朝觀俗調化故
生無鬱滯物獲脩通釐風拯患於茲爲急朕以輜薄
昧于大道因璿璣之曆遵三德之運緬鑒前哲寤寐
求歎思所以闢訪治蠹詢求民瘼才寡務殷若無津
滌故以情深危薄心疚夙夜矣可普遣大使分行四
方推賢薦能問疾舉滯若其采野不闢犴訟有虧妨
氓利害擾黷政經者具以奏聞如其讜言嘉話真士

文苑 南齊卷九
智才亦依名騰上隨事均量務取厥中朕將親覽以
弘遠化

賜赦交州詔

門下交部昔值時諉負海不朝因迷遂往歸欵莫由
今創制萬寓烟煴造物原形四裔澤浹中畿慙彼邊
氓未均王化宣弘遠仁蕩以更始可曲赦本州統內
咸同曠泰李叔獻一人即撫南土其股肱文武詳材
選推并遣大使宣揚朝旨

斷募士詔

門下設募取將懸賞購士蓋出權宐非曰經制項者
民罹氛藹世襲艱阻因時流故浸以成俗斯風蕩而
未返且滋長逋逸開罪山湖遂乃鯨刑不辱草竊無
咎平政察治萌合甄革自今已後可悉斷衆募

封江冠軍等詔

門下締基締業序功攸急開曆闡祚酬庸爲先故以
式藹曩書載炳前軌文仲假等或成亮艱危効彰屯
鼓皆績幹兩宣勒國兼立宜各分珪社以酬厥勞謚

大赦詔

門下朕思弘風教而刑圉猶積未言前烈兢歎載懷
今履端告始羣后執贄治洽樂交華夷同泰雖和慙

文苑
南齊卷九
擊石采愧卿雲然景業初基義深恒典慶動玄靈歡
溢都縣憫彼幽黔猶隔茲澤思我兆民共熙至化

北伐詔

門下朕統曆馭政志包函夏庶摠文軌無思不服而
逖焉狡虜久爲邊虞及宋末不庭授策乖律北州外
淪威風內毀鑿彼隆替慨歎盈懷冕旒濟河翦彼凶
狄咸秩中岳望祀汾陰則聲教鬯矣猶以經綸爲始
恩化甫洽勞民擾衆爲政所重故方輟六師按經九
伐今淮泗告驚羽書馳聞醜羯妖燼送死北垂徵天
人之數撫自來之會無勞遠兵剿撲爲易盖因茲大

號蕩其巢藪可遣使某官組甲十萬鐵騎千馬斜趨
潁洛衝其要津某官某虎旅八萬舳艫數千沿淮長
驅稜威清汴某官某舟師五萬直出淮淝某官控江
右之銳駱驛既進某官某率羽林勁勇爲水陸形援
某官某甲等並率義勇之衆互盡犄角之機戎車戒
路事宜摠一使持節都督南徐兗二州諸軍事後軍
將軍南徐州刺史長沙王晃出次江都爲衆軍節度
驍雄竟奮火烈風掃剋定中原肅清河洛便可內外
纂嚴以時修辦

王僕射爲左僕射詔

門下端貳樞秘寔惟國楨緝典宣機所寄時彥尚書
右僕射領吏部尚書南昌縣開國公儉器懷明亮風
情峻遠業積珪璋才兼經緯况乃節亮帷幄譽敷端
揆升授之宜蓋允具瞻可左僕射

王撫軍爲安東吳興詔

門下震澤殷奧撫馭須才都官尚書撫軍潯陽郡開
國公敬則志幹貞烈秉情開敏忠勤之至形乎出內
必能綏懷大邦克隆美政

曲赦丹陽等四郡詔

門下朕興言民瘼昧旦求政所以庶存簡惠緝茲治
道而玉燭未調祥風尚鬱京輔及三吳昔歲水災秋
登旣罕今茲厲疾罹患者多納隍之歎爲矜良深可
曲赦揚州所統丹陽吳興南徐州所統義興等四郡
其遭水左劇之縣自今年以前三調未充而虛例已
畢官長局吏應共備賞者雖積事爲愆情在可亮外
詳所際以弘優澤

王僕射領太子詹事詔

門下管司東朝歷代所重自非國華莫允斯任侍中
尚書左僕射南昌縣開國公儉鑒識清贍理懷秀澈
績亮朝端譽敷僉議贊業攸光物聽斯緝宜摠二官

以穆彝序

何詹事爲吏部尚書詔

門下官人之職實難其選所以弼諧彝品謨明庶績
今思治惟急彌不可曠侍中太子詹事戢業履脩平
體識詳隱自升官闡美譽咸聞必能無懈于位爰茲
流序

王侍中爲南蠻校尉詔

門下荆楚殷曠任重寄深毗左之選非良勿授侍中
領秘書監驍騎將軍奐秉心貞元志局開亮績譽之
美在公屢彰必能贊政南紀播惠西夏

王光祿爲征南湘州詔

門下衡岳名區荆湘奧壤自頃彫弊綏撫須賢侍中
光祿大夫丹陽尹僧文德履淹邃識局詳正冲素之
朝望攸歸歷職之庸載懷僉聽往任沅湘餘惠在民
今宜重敷善政申此懿績

柳僕射爲南兗州詔

門下河兗衝要維扞中畿司牧之任宜詳其授後將
軍領軍新除尚書左僕射涇陽郡國公世隆業體淹
濟思情通敏功書王府績彰累任必能宣弘恩政威
懷萬里雖哀疾毀頓而禮有權奪

王僕射加兵詔

門下散騎常侍尚書左僕射太子詹事南昌縣開國公儉忠款昭著任寄隆深既光朝猷允屬民聽宜增威飾以崇望實可加兵二百

立學詔

門下夫膠庠之典彝倫攸先所以昭振才端啓發性緒弘世字氓納之軌儀是故五禮之迹可傳六樂之容不泯朕自膺曆受圖志圖經訓且有群寮奏議橫集以戎車屢警文教未敷息樂辟雍永言多慨今關隧無虞時和歲稔遠邇同風華夷慕義便可式遵前準修建教學精選儒官廣延國胄

王鎮軍爲中書令右光祿詔

門下綸言要密歷選爲難優秩崇顯允在舊德使持節都督江州豫州之新蔡晉熙二郡諸軍事鎮南將軍江州刺史延之業履冲約秉情閑素譽彰頻試績著累朝自居南服徽庸克舉宜升寵章管兼樞秘

張令爲太常領國子祭酒詔

門下庠議旣敷縉紳攸屬師氏之任宜歸儒素散騎常侍中書令驍騎將軍揚州大中正緒器識清簡理懷恬約譽洽朝聞聲緝民聽必能闡揚玄宗式範胄

子兼掌宗伯望實惟空

蕭冠軍進號征虜詔

門下維翰之重實資名品使持節都督郢州司州之
義陽諸軍事冠軍將軍郢州刺史南昌縣開國侯鸞
體局弘濟器操端敏自蒞任夏首美政殷流必能聿
宣國化以庇人瘼宜崇顯秩允茲聲望

褚侍中為征北長史詔

門下蕃佐須才非良莫寄侍中領步兵校尉炫識業
清悟思懷淹暢出內之譽日聞其美宜弼諧親屏以
申茂績

尚書符

起都宮軍局符蘭臺○宋書沈攸之傳所載附後

侍御史大夫尊冠賤履君臣斯位愛順惡逆成敗可
燒未有憑陵我江郊侵軼我河縣而不流竟漂骨丹
宗血祀者也沈攸之寂寥無文起自甲卒邀我百戰
之軍乘彼一捷之幸鐫山裂地紐紫要金擁旗蕃伯
便無北面之禮受符方屏即有專征之釁箕賦深歛
毒被郢南枉法矯刑毒聞荆西鬼怪其性故從始而
遂終狼戾其志乃延少而待老山陵不奔移袂為慶
踐祚無賀按劔稱予遂乃關馳送書亭炤妖火此而
可賒孰不可宥今遣陳成叔彭文之等敢勁三萬前

驅電耀呂安國任侯伯桓崇祖曹虎頭等樓艦五萬
騎射蛟中流苟元賓郭文孝程隱雋等輕舸二萬高
旌蔽日周盤龍張文嘉薛道淵等鐵馬五千龍驤後
陣凡此諸帥莫不氣薄日月精變虹蜺或飲羽石梁
或超踰門樓索鐵拔距孤視萬旅顧盼則前後生風
喑鳴則左右激電然鑾戎薄臨驍虎百萬六軍徐軌
五輅遲旆丹艦發炤素甲生波樓煩白羽投鞍成岳
漁陽黑騎浴鐵為群於是高山與深谷同湮紫芝與
白艾同滅不亦惜乎惜乎符至之日幸加三省其驅
逼寇手之人鋒陣塢壁之主若有投命軍門一無所

問或能因罪立績賞不示私斬祛射袂唯功是與購
募之科具列如上信如白水激然無二臺明詳旨飛
火普加宣才文書千里馳驛

尚書符征西府討沈攸之

攸之自江陵至沌口聞齊王世子據

盆口不敢下因攻郢城時齊王輔政遣軍西討尚書符征西府

尊冠賤屨君臣之位奉順忌逆成敗斯兆未有憑陵
我郊圻侵軼我河縣而不焚師殪甲靡旗亂轍者也
沈攸之少長庸賤擢自閭伍邀百戰之運乘一捷之
功鑄山裂地腰金拖紫窮富于國極貴于家擁旄蕃
伯便無北面之禮受督志屏即有專征之釁橘柚不

薦瑒替罕入箕賦深歛毒被南郢枉繩矯墨害著西
荆饕餮其心谿壑其性從始至終沿壯得老今遂驅
迫妖黨繕集尪卒結釁外城送死中甸此而可忍孰
不可懷今遣新除使持節督郢州之義陽諸軍事平
西將軍郢州刺史聞喜縣開國侯黃回員外散騎常
侍冠軍驍騎將軍南臨淮太守重安縣開國子軍主
王敬則輔國將軍屯騎校尉長壽縣開國男王宜與
輔國將軍南高平太守軍主陳承叔輔國將軍左軍
將軍南濮陽太守葛陽縣開國男軍主彭文之龍驤
將軍驃騎行參軍軍主召宰精甲二萬前鋒雲騰又

遣散騎常侍領游擊將軍湘南縣開國男新除使持
節督湘州諸軍事征虜將軍湘州刺史軍主呂安國
屯騎校尉寧朔將軍崔慧景輔國將軍軍主任候伯
輔國將軍驍騎將軍軍主蕭順之輔國將軍游擊將
軍軍主垣崇祖寧朔將軍虎賁中郎將軍主尹略屯
騎校尉南城令曹虎頭舳艫二萬駱驛繼邁又遣輔
國將軍後軍將軍右軍中兵參軍事軍主苟元賓寧
朔將軍撫軍中兵參軍事軍主郭文孝龍驤將軍撫
軍中兵參軍事軍主程隱雋輕艫一萬截其津要新
除持節督廣交越寧湘州之廣興諸軍事領平越將

郎將征虜將軍廣州刺史統馬軍主沌陽縣開國子
周盤龍輔國將軍後軍統馬軍主張文愷龍驤將軍
軍主薛道淵冠軍將軍游擊將軍并州刺史南清河
太守太原公軍主王敕勤龍驤將軍射聲校尉王洪
軌龍驤將軍宓從僕射軍主成置等鐵馬五千龍驤
後陣凡此諸帥莫不勇力動天勁志駕日接衝拔距
鷹瞵鶚視顧盼則前後風生喑鳴則左右電起以此
攻城何城不克以此赴敵何陣能堅然後鑿戎薄臨
龍虎百萬六軍齊軌五輅輸旆丹檻發照素甲生波
樓煩白羽役輦成岳漁陽墨騎浴鐵爲群芝艾同焚
悔將何及符到之日幸加三省其鋒陣營壁之主驅
逼寇手之人若有投命軍門一無所問或能因罪立
績終不爾欺斬裾射玦唯功是與能斬送攸之首封
三千戶縣公賜布絹各五千疋信如河海皎然無貳
飛火軍攝文書千里驛行

慰勞雍州文

皇帝謝鎮軍寧蠻二府雍州文武士庶等夫忠爲令
德或感槩殺軀信實美行或殉義蹈節而沈攸之小
豎反覆稱逆西藩袁粲劉康潛使相扇遂擁據石頭
並圖廟社粲康旣從王憲蒼黎同慶攸之孤州蟻聚

勢必燼滅刺史張敬義氣雲騰秣馬星驅全羽十萬
殄茲氛鯨曾不旋踵彼州南陽白水將相遺風忠義
之士霜戈電發但戎車暫動念原未寧冬寒卿皆無
恙

袁友人傳

友人袁炳字叔明陳郡陽夏人其人天下之士幼有
異才學無不覽文章倣儻清贍出一時任心觀書不
爲章句之學其篤行則信義惠和意罄如也常念蔭
松栢詠詩書志氣跌宕不與俗人交俛眉暫仕歷國
常侍員外郎府功曹臨湘令粟之入者悉散以贍親

其爲節也如此數百年來有此人焉至乃好妙賞文
獨絕於世也又撰晉史竒功未遂不幸卒官春秋二
十有八與余有青雲之交非直銜杯酒而已嗟乎斯
才也斯命也天之報施善人何如哉何如哉

建平王太妃周氏行狀

竊聞侯服之譽非黃冠能敷王室之問寧阜衣所述
諒畏褒美於君后被空名於鼎貴然有漢臣誅行晉
史書德者亦云實而已焉伏見國太妃稟靈惟岳集
慶自遠世擅淮汝族冠疇代故以載曜聲書式炳滕
牒矣太妃誕離明之正和涵雲露之中氣凝采韶歲

賁章笄年若乃彤管女圖之學纂組綺縞之工升降
虔謙之儀柔靜居順之節莫不中道若性不嚴而成
故譽滿闈閭聲聞軒殿以元嘉某年歸于故司徒宣
簡王旣而弟高坦倫袂踰外品青軒華轂用光國輝
素壁丹墀寔隆家貴具惟姻娣靡不式瞻而居尊以
簡訓卑以弘躬謹蘭閨身撫椒第若衛娥之炯行樊
羸之映操方之蔑如也大明二年宣簡王薨太妃藉
悲用禮撫孤用慈柔懿之德愈彰肅敬之問日被雖
文伯之母言不踰閩莒相之主行存乎勤無以過也
大明某年拜建平王太妃是時今王春秋方富德業
未降藉茲金響終能玉播故綺襦出宰弱冠升朝者
亦太妃劬勞之訓也謂天蓋高降年不永以太豫元
年二月三日薨于荊州之內寢凡厥遠邇以哀以歎
今祖行有期泉窆無遠素旂望路綵旌思歸所以垂
宣徽容髣髴金石者謹詳牒行狀具以申言

齊太祖高皇帝誄

日月鬱華風雲黯色傷動紫微悲匝璇極嗚呼哀哉
粵夏四月辛卯將遷座于泰安陵龍鑿既整羽衛以
陳深酸舊物掩咽故臣嗣皇帝未訣丹掖叫然青墀
攀神光之一絕慟遠邇之何期弓劍有慕纂德寫辭

文苑
南齊卷九
一
僉曰若稽古聖璿圖靈鏡星樞發祥電光啓命誕惟
弱齡惠志聰情如金如璧爰秀爰英於鑠冠歲騰華
流藝允文允武克明克睿幸尚登學嚴道遵師宣散
五禮優游六詩上炫舊滯旁鏡前疑才罄艷采筆盡
麗辭在支斯悌于親伊孝儉泰共色夷阻一貌遊情
勰矩縱心蹈教鄉術式慕州閭是效業優登仕先哲
攸懋矧乃寥廓淵規邃構官府天地舟輿宇宙龍靜
鳳戢歛竒拚秀昔在帝劉王室放命狡焉僞誕晦朔
陵正鋒車北軼燿火南盛太祖時乘爰茲發迹塞井
滅勳夷竈龕敵賞鏤王圖功 帝冊乃厲中葉天未

歛難兵百表曹禍十楚漢吳地前崩越壤首亂街號
燿盛火烈金斷聚甲如陵獻俘爲觀北楚倔強曾未
屈膝雲屯被野魚麗亘日廟勇既消國圖方匱神冊
天開雄略世出凶劔鱗沈醜戈羽逸隻騎不返蹄輪
無匹厥庸戾止離珮委他榮鬱閭闔寵重山河皇彝
有文朝采方藹頻煩金紐左右緹蓋毗戎肅禁叅輦
侍旆譽馥區中道愛氓外河濟國險淮泗邦塵要藩
重設匪賢則親亦既推轂擁土庇民聲稜絕俗威贍
殊隣宋主陵遐紫殿過密話言之詔貽在英粹寅亮
大寶敷綸妙秘世識機鑿物宗淵懿無復匪練匪奧

不泊三階既馴五精惟至彭蠡九江地盡襟製亦有
劉範衣纓是絕躍馬山岫泛舟河滋縞鎬星流紅旗
電結鶴翼競扇豺牙爭礪禍纏紫禁兵交丹衛瑤祀
若於金辰如綴朝野傾儀咸歸上德實賴至公瀉家
提國懷險實泰襄危必克機造朝旦功定曛黑妙物
更配具章重則深居撝外遙棲縣默高秩方臻元禮
有序王曰念哉輝寵是與職褒宮閣任卷文武飾華
麗貂縈金疊組宏猷溢俗曾芬冠古憬彼朱方亦惟
宗秩陰圖食昴潛謀貫日征輪未誓偏旗銜律原燎
既寂世囂伊謐爰崇爰貴以望以實鴈縣告靜象郡

無虞杳鬱遠域清麗瓊都國填岷負朝委事虛寔鬱
哲相嶽曜神居功美既損道富去益再紐契訓重匡
禹迹方同范張濯情汾射散簪山郊解珮松石頽霞
拂朝蒼烟惜夕韻屬玄經恩流金液靈厭霸德少帝
告釁滅慈滅養抵仁抵信枉獄炎鑪淫刑霜刃剖忠
剪義樊稚斲櫬慄慄方岷曰怨曰震妖蜺將崩災裂
昊蒼况乃鼎國資滌資匡臨朝闡命遏昏立綱事縣
毗漢義締翼商既綏地職亦懋天工權輿典緯俾作
司空黼黻珣戈祐宇升庸徒賜先袞爰永渥冲實曰
驃騎卷迹辭功寰寓睦政畿甸綸風沈氏滔天勃逆

舊楚氣蹂黃池志轍柏舉裂禮柶度毀經棄序黑驪
黥山朱旗頽渚短兵接伍長鍛爲羣顛如海岸蠹似
峰雲若乃霧激離則霞分荆國既軼郢縣方焚袁劉
二戾焱起煒發聯謀制外儲兵內襲覺激瓊殿勢崩
金闕志乘玄壘圖矯秘鉞鴻妖逝星高侵棄月惟時
諸侯上脫下競圖服淆蕩實綴仁聖輝燿國靈導揚
主命曾規近晰深暮遠鏡左輪朱赭表裏斯定七德
飾歌九功粹詠乃陟上鉉寵文方輝誕錫有秩綵吹
旌旗贊政瑤光翊教太微寔曰太傅爰登相國緝氓
以禮綜祗以德景福咸湊芳猷允塞羽泳式造絃縣
是則金湯無險軌書攸同迴迴寵迹窈窈睿功寶珪
黛壤俾王于東絢冊是敷懋物既崇設業設虞丹懸
碧鏞於穆顯相黎元時邕冰洲炎徼來獻其駮鴈海
龍關亦柔好音梁黿棧鼉越險浮深遠戎皆覲上靈
必臨山吐石青野降蜜露瑞芝麗草珍柯爛樹人崩
俗締玄緯幽數睠此妙德跂我王度遙滯炎旻既變
至公萎蕤媯華文祖受終大宋有訓高撝萬邦容豫
慶雲游行南風正服寶位圓光玉繩御繡懷古負黼
夙興丘礙必靜淵漪咸澄勛辰有作黔牖其義矜卑
廣慈合賤兼愛綴機剗賊輕章削罰迹去繁侈情歸

素一軒靡龍刻楹無丹密越賤申椒楚輟靈橘陵寢
起邑池藻誰縣遙館罕御離房空薦惇教露宮淹神
正殿斟酌信義左右律禮瑩彼皇維燁茲國體胄業
既樹壁流方啓漢求金岫吳寶銅塹寧若睿德讓駟
却劔寔才爲貴唯功是念火職咸允雲官亦濼既臯
乃益匪稷伊夔無缺巡風寧埃辨詩玉燭調文金英
最節乘山呈瑞航海歸闕不曠景冊靡空歲月受緯
機衡兼甄書史孫韓合辨莊墨異理昭政往藹洗銀
前軌逍遙星斗徒倚涼雲春飈方舞秋鴻初分式謠
式詠載績載文邈哉我后淪泳賢聖罄品作號盡物

歸政蒼黎汰驩玄靈刷慶未戢嘉祉方寅景命締詳
有文颯沛將掩理昧人詖道懸世險復路遺圖忌華
狗儉文闇陳几翌明告漸蜺備鬪食日月朏精矧在
乘輿宇折宙傾稜纏鸞掖悲赴紫扃去璇臺之照襲
珠蟻之冥嗚呼哀哉惟宮低景輦路戲光惻栢門之
黯黯泣松帳之茫茫上宮擗而詔御咽羣后慕而侍
衛傷攢靈既儼遠日以筮鬱鬯既奠龍酌撤素月夜
橫翠烟曉結縱虛金而下欵吟空蕭而增絕嗚呼哀
哉於是颯天駕而從綺輿澁神行而撫文輦傍建春
而南躡徑宣陽而東踐尚蓋蓋而未散乍眇默而不

轉睇千乘之共啜盼萬騎之相滋
魏后之戀譙惻
漢主之懷沛辭金陵之匪義降雲陽之杳藹風竒響
而駐軒煙異色而低旆怨街邑之綵驂弔原野之縞
蓋挽夫愴而征馬凝痛縈盈其如帶嗚呼哀哉複林
油雲重山減日御房清淒神路冥謐昭徒蕭燾幽祇
竦蹕攀光灑動臨泉澍泗瓌座長嚴雕宮未閱寂帳
寂兮寂已遠夜釭夜兮夜何邃嗚呼哀哉

宋故尚書左丞孫緬墓誌文

光靈維周肇祀伊衛炤分上代鏡華中世睿誕降明
秀芳嗣烈學惟物範行實士節容與書林優遊史藝
素巾俄 朱紱累轍來訪詩逸入詢禮缺麗名文質
齊影儒喆慶履匪舒沴氣遽結殞帷兮既晦泉火兮
已閉暖遺波于遙緒颯流馨于遠歲

宋故安成王右常侍劉喬墓誌文

丹陽韞聖豐鄉降賢玉葉既積金徽方傳乃毓伊人
尅廣克宣騰芬中屬飛藻上年杳杳虛素永永冲關
雲意霜拍瓊立冰堅家寶以瑩國才未甄叅錯報善
芒昧雲玄歛魂幽石委氣空山膚若流波身如絕煙
芳菲一逝美懋徒鐫

宋故銀青光祿大夫孫夔墓誌文

川祇効鏡岳祥獻明碧葉獨秀瑤源自清幼炳器譽
夙耀才名體兼遷雲學備儒史紫閣咸趨朱軒既履
貴交慕塵素遊企軌騰藻上京振彩下國如彼綠蘭
乘芬四塞欵人逕之不平歎天路之冥默貴夫君之
爲美播靈均與正則

齊故御史中丞孫詵墓誌文

筠以霜藹蘭以風薰深哉若人寔好斯文系緒承胄
激藹驚芬才基魏粲學參漢雲覽志上載洽鏡前聞
騰名冠俗揚采絕群方勰明世式贊睿君如何不淑
天道難分敢雕窆石未晰幽墳

齊故司徒右長史檀超墓誌文

惟金有銑惟玉有瑤君實淵哉行爲世標高志灑落
逸氣寂寥奧學內溢深文外昭嘉采籍譽登國振朝
亦既有美筠傷蕙凋人邇運曠世促道遼未矣仁矣
流芳無澆

蕭驃騎祭石頭戰亡文

咸告忠貞之魂曰義惟行首雄實士節嗟爾驍驚稟
才蹈烈守玉不渝懷冰可折氣彰靡旗情激亂轍高
墉摧堅巨醜挫銳深痛克矜冤靈及雪隆恩殊悼臨
爾以欵千秋同盡百齡一世魂而有知咸無遠邇鳴

呼哀哉

蕭太傅東耕呪文

敬呪先穡曰攝提方春黍稷未華灼爍發雲昭燿開
霞地煦景暖山艷水波側聞晨政實為民天競秬獻
歲務畎上年有滄疎闢興雨導泉崇耕巡索均逸共
勞命彼倌人稅于青臯羽旗銜蕤雄戟燿毫呈典緇
耦獻禮翠壇宜民宜稼克降祈年願靈之降解珮停
鑿神之行兮氣為輶神之坐兮煙為蓋使嘉穀與玄
鬯未爭光而無沫哉

南齊文紀卷第九

南齊文紀卷第十

晉陽張焯叅定

閩莆余颺訂閱

江東梅鼎祚纂輯

江淹

雲山讚四首 并序

壁上有雜畫皆作山水好勢仙者五六雲氣生焉悵
然會意題為小讚云

王太子

子喬好輕舉不待煉銀丹控鶴去窈窕學鳳對嶺屹
山無一春草谷有千年蘭雲衣不躑躅龍駕何時還

陰長生

陰君惜靈骨珪璧詎爲寶日夜名山側果得金丹道
憂傷未不至光顏如碧草若度西海時致意三青鳥

白雲

紫煙勢不覲赤鱗庖所捐白雲亦海外蒼蒼起三山
蕭瑟玉池上容裔帝臺前欲知青都裏乘此乃登天

秦女

青琴既曠世綠珠亦絕群猶不及秦女十五乘綵雲
璧質人不見瓊光俗詎聞願使洛靈往爲我道音芬

銅劍讚

崇文書目銅劍讚一卷

求明初始造舊宮鑿東北之地皆平岡迤隴尤多古
冢墓有人得銅劍長尺五寸余既借看歎其古異客
有謂余曰古時乃以銅爲兵乎其可得而聞不余笑
而應曰此證據甚多殆不俟言卿既欲知輒具言之
余按山海經曰昆吾之山其上多赤銅郭璞注曰此
山出金如火以之切玉如割泥也周穆王時西戎獻
之尸子所謂昆吾之劍也越絕書曰赤瑾之山破而
出錫若耶之谿涸而出銅歐冶鑄以爲純鉤之劍又
汲冢中得一銅劍長三尺五及今所記干將者亦皆
非鐵明古者以銅錫爲兵器也周書稱穆王時征犬

戎得昆吾之劍火浣布長尺有咫又有鍊銅赤刀切
玉如泥焉又左傳僖公十八年鄭伯始朝于楚楚賜
之金既而悔之盟曰無以鑄兵故以鑄三鍾杜預注
云楚金利故也古者以銅爲兵故禹貢云荆揚貢金
三品余以爲古者語質而難解今者語文而易了獨
詩云元龜象齒其實象牙也書云厥包橘柚乃黃柑
也金品上則黃中則赤下則黑黑金是鐵赤金是銅
黃金是金黃金可爲寶赤金可爲兵黑金可爲器韓
子稱昔智伯繇之伐趙襄子初晉陽襄子金將盡問
於張孟談孟談對曰吾聞董安于治晉陽也公室悉

以銅爲柱質君可發而用之於是發之有餘金矣謂
此據蓋可知焉又昔夏后氏使九牧貢金鑄九鼎于
荆山之下于昆吾氏之墟白若甘攬之地圖其山川
竒怪以形于鼎使民知神姦不逢其害以定其祥鼎
成三足而方不炊而自沸不昇而自藏不遷而自行
九鼎既成定之國都桀有昏德鼎遷于商殷紂暴虐
鼎遷于周每人主休明鼎雖小而重其姦回昏亂雖
大而輕及周顯王三十二年姬德大衰乃淪入泗水
秦始皇之初見于彭城二十七年始皇東遊大發徒
出之而不能得焉後漢武帝賓禮百神于汾陰得大

鼎時人以爲九鼎其詳不可得而審也且荆軻刺秦王之日匕首擊銅柱銅柱火出則古者非直以銅爲匕首亦以爲殿柱也且始皇之世長狄十二見于臨洮身長三丈足跡六尺於是始皇歛天下之兵鑄而象之故西京賦云高門有閔列坐金狄是也又造阿房之宮其門悉用磁石磁石喻鐵以防外兵之入焉以此推之明知春秋迄于戰國戰國至於秦時攻爭紛亂兵革互興銅既不充給故以鐵足之鑄銅旣難求鐵甚易是故銅兵轉少鐵兵轉多年甚一年歲甚一歲漸染流遷遂成風俗所以鐵工比肩而銅工稍

絕二漢之世逾見其微及漢建安二十四年魏文帝爲太子時鑄三寶刀二匕首天下百鍊之精利而悉是鑄鐵不能復鑄銅矣按張華博物志亦稱鑄銅之工不復可得唯蜀地羌中時有解者由此言之斯妙久絕余謂不復能鑄銅者正當不能使利如霜雪光如雲霞陸斬犀兕水斷蛟龍豈復不能鑄銅鑪錠燈耶然今太極殿前兩大銅鏡即周景王鑄也製作精巧獨絕晚世今之作必不及古猶今鏡不及古鏡今鐘不及古鐘矣昔余爲吳興令鑿池又獲銅箭鏑數十枚時有人復於彼山中伐木得銅斧一口古銅鑄

爲兵豈爲一據故備言其詳以發子之蒙矣古貴銅
賤鐵非獨此事按皇覽帝王冢墓記稱吳王闔閭冢
銅槨三重汞池六尺玉鳧之流扁諸之劍三盤郢魚
腸之劍在焉秦始皇冢亦以銅槨水銀爲江河關東
賊發之至銅槨而取銅深大不可多得因此穴塞漢
陳思王冢特奢侈皆生葬取愛幸奴僕婢蓄穀爲銅
窻以通殉葬者氣息兼以水火守冢給呼召數十年
乃不復聞聲矣晚世之葬無復此例猶然猶是大奢
大富大盛或傾一國之財或竭一家之寶或爭爲宏
麗或競相高尚前漢奢于後漢魏時富于晉世中原

既夷至于江左時天下凋喪制度日衰富貴之家猶
或厚葬然論古論曩亦減損千萬倍矣世愈貧狹哀
禮愈薄又往古之事棺皆不用釘悉用細腰其細腰
之法長七寸廣三寸厚二寸五分狀如木杵兩頭大
而中央小仍鑿棺際而安之因普漆其外一棺凡用
細腰五十四枚大略如此亦可謂至巧矣其法既絕
亦有銅釘銅釘之體皆如今柘釘形也銅釘既滑多
被發掘自義熙以來乃以柘代桐爰及明器之屬亦
多減省必不得已而用烏牙焉相與皆用素棺不得
施漆及自棺之外一無所設既由貧富之懸兼以避

患之及耳故爲此讚以明古今銅鐵之兵刃葬送之事焉乃成讚曰

悠悠開闢或聖或賢蚩尤鑄銅爲兵幾年天生五才實此爲先既古既曩誰測誰傳紛綸百代事無不異况乃金鐵國之利器風胡專精歐冶妙思於昔則出於今則祕聞之釋經萬物澹薄在古必厚在今必惡徒侈徒異徒剗徒削聊舉一槩以明鴻略

草木頌十五首

并序

僕一命之微遭萬代之幸不能鑄心礪骨以報所象擢翼驥首自致丹梯爰乃恭承嘉惠守貶閩中且僕

生人之樂久已盡矣所愛兩株樹十莖草之間耳今所鑿處前峻山以蔽日後幽晦以多阻飢猿搜索石瀨戔戔庭中有故池水常決雖無魚梁釣臺處處可坐而葉饒冬榮花有夏色茲赤縣之東南乎何其奇異也結莖吐秀數千餘類心所憐者十有五族焉各爲一頌以寫勞魂

金荆

江南之山連嶂連天既抱紫霞亦漱絳烟金荆嘉柯涵露宅仙姝節詎及幽意誰傳

相思

竦枝碧澗卧根石林日月斷色霧雨恒陰綠秀八炤
丹實四臨公子不至山客徒尋

豫章

伊南有材匪桂匪椒下貫金壤上籠赤霄盤薄廣結
捎瑟曾喬七年乃識非曰終朝

栢欄

異木之生疑竹疑草攢叢石逕森蓰山道煙岫相珍
雲壑共實不華不縟可避工巧

杉

桐梓舊麗松枯稱竒

茲品獨秀青崖羣木歛望

雜草不窺長入烟氣未參鸞螭

檉

木貴冬榮檉實寒色停黛峰頂挿翠石側碧葉菴藹
頑柯翕絕方陋筠檟遠笑荆棘

楊梅

寶跨荔枝芳軼木蘭懷蕊挺實涵英糅丹鏡日繡壑
炤霞綺巒爲我羽翼委君玉盤

山桃

惟園有實惟山有叢丹蘄擎露紫縈繞風引霧如電
映烟成虹伊春之秀乃華之宗

山中石榴

美木艷 誰望誰待縹華翠萼紅英絳采炤列泉石
芬撓山海竒麗不徒霜雪不改

木蓮

迸采泉壑騰光淵丘緗麗碧巘紅艷桂洲山人結侶
靈俗共遊時至不採爲子淹留

石上菖蒲

藥實虛品爰乃輔性却痾衛福蠲邪養正縹色外妍
金光內映草經所珍仙圖是詠

黃連

黃連上草丹砂之次禦孽辟妖長靈久視驂龍行天
馴鳳匝地鴻飛以儀順道則利

署預

華不可炫葉非足憐微根儻釁棄劔爲仙黃金共鑄
青腹爭妍君謂無妄我驗衡山

杜若

山中杜若嘉爾翠質不竒不俗載華載實同銜夕露
共烘朝日夷險無二沉冥如一

藿香

桂以過冽麝以太芬摧阻天鑄夭折人文詎及藿香

微馥微薰攝靈百仞養氣清霄

雜體三十首序

夫楚謠漢風既非一國魏製晉造固亦二體譬猶藍朱成彩雜錯之變無窮宮角爲音靡曼之態不極故娥眉詎同貌而俱動於魄芳草寧共氣而皆悅於蒐不其然歟至於代之諸賢各滯所迷莫不論甘則忌辛好丹則非素豈所謂通方廣恕好遠兼愛者哉乃致公幹仲宣之論家有曲直安仁士衡之評人立矯抗况復殊於此者乎文貴遠賤近人之常情重耳輕目俗之恒蔽是以邯鄲託曲丁李竒士季假論于嗣

宗此其効也然五言之興諒非復古但關西鄴下既以罕同河外江南頗爲異法故玄黃經緯之辨金碧浮沉之殊僕以爲亦各具美兼善而已今作三十首詩數其文體雖不足品藻淵流庶亦無垂商榷云爾

倡婦自悲賦序

漢有其錄而亡其文泣蕙草之飄落憐佳人之埋菴乃爲辭焉

青苔賦序

余鑿山楹爲室有苔焉意之所之故爲是作云

石劫賦序

劫一作螭

海人有食石劫一名紫蠶蚌蛤類也春而發華有足異者戲書爲短賦

蓮華賦序

余有蓮華一池愛之如金宇宙之麗難息絕氣聊書竹素儻不滅焉

丹沙可學賦序

咸曰金不可鑄僕不信也試爲此辭精思云爾

赤虹賦序

東南嶠外爰有九石之山乃紅塵十里青萼百仞苔滑臨水石險帶溪自非巫咸采藥羣帝上下者皆歛

意焉於時夏運始舒春蓀未歇肅舲波渚緩拽汀潭正逢巖崖相炤雨雲爛色俄而雄虹赫然暈光耀水偃蹇山頂舄奕江湄僕追而察之實雨日陰陽之氣信可觀也又憶昔登鑪峰上手接白雲今行九石下親弄絳霓二難再感而作賦

橫吹賦序

驃騎公以健卒十萬禦荆人于外郊鐵馬煩而人聳色綵旄耀而士銜威軍容有橫吹僕感而爲之賦云

傷友人賦序

僕之神交者嘗有陳郡之袁炳焉有逸才有妙賞博

學多聞明敏而識竒異僕以爲天下絕倫黯與秋草
同折今不復見才矣既而陳書有念橫瑟無從雖乏
張范通靈之感庶同嵇尚篤徒之哀乃爲辭曰

知己賦序

陳國之華者故吏部郎殷孚其人也博而能通學無
不覽雅賞文章尤愛竒逸雖志隱巖石而名動京師
矣才多深見氣有遠度雖安期千里不能尚焉始於
北府相值傾蓋無已僕乃得罪嶠外遐路窈然始還
舊都會君尋卒故爲茲賦以寄深哀

學梁王兔園賦序

或重古輕今者僕曰何爲其然哉無知音則已矣聊
爲古賦以奮枚叔之製焉

傷愛子賦序

廣弘明集

江亢字胤卿僕之第二子也生而神俊必爲美噐惜
哉遘閔涉歲而卒悲至躑躅乃爲此文

遂古篇序

弘明集

僕嘗爲造化篇以學古制今觸類而廣之復有此文
兼象天問以遊思云爾

雜三言五首序

予上國不才黜爲中山長史待罪載究識煙霞之狀

既對道書官又無職筆墨之勢聊爲後文

自序

淹字文通濟陽考城人幼傳家業六歲能屬詩十三而孤邈過庭之訓長遂博覽羣書不事章句之學頗留精於文章所誦詠者蓋二十萬言而愛竒尚異深沉有遠識常慕司馬長卿梁伯鸞之徒然未能悉行也所與神遊者唯陳留袁叔明而已弱冠以五經授宋始安王劉子真略傳大義爲南徐州王新安從事奉朝請始安之薨也建平王劉景素聞風而悅待以布衣之禮然少年嘗倜儻不俗或爲世士所嫉遂誣

淹以受金者將及抵罪乃上書見意而免焉尋舉南徐州桂陽王秀才對策上第轉巴陵王右常侍右軍建平王主簿賓待累年雅以文章見遇而宋末多阻宗室有優生之難王初欲羽檄徵天下兵以求一旦之幸淹嘗從容曉諫言人事之成敗每日殿下不求宗廟之安如信左右之計則復見麋鹿霜棲露宿於姑蘇之臺矣終以不納而更疑焉及王移鎮朱方也又爲鎮軍叅事領東海郡丞於是王與不逞之徒日夜構議淹知禍機之將發又賦詩十五首略明性命之理因以爲諷主遂不悟乃憑奴而黜之爲建安吳

興令地在東南嶠外閩越之舊境也爰有碧水丹山
珍木靈草皆淹平生所至愛不覺行路之遠矣山中
無事與道書爲偶乃悠然獨往或日夕忘歸放浪之
際頗著文章自娛在邑三載朱方竟敗焉復還京師
值世道已昏守忠閑居不交當軸之士俄皇帝始有
大功於四海聞而訪召之爲尚書駕部郎驃騎竟陵
公參軍事當沈攸之起兵西楚也人懷危懼高帝嘗
顧而問之曰天下紛紛若是君謂如何淹對曰昔項
強而劉弱袁衆而曹寡羽號令諸侯竟受一劍之辱
紹跨躡四州終爲奔北之虜此所謂在德不在鼎公

何疑焉帝曰聞此言者多矣其試爲我言之淹曰公
雄武有奇略一勝也寬容而仁恕二勝也賢能畢力
三勝也民望所歸四勝也奉天子而伐逆叛五勝也
攸之至銳而器小一敗也有威而無恩二敗也士卒
解體三敗也搢紳不懷四敗也懸兵數千里而無同
惡相濟五敗也故豺狼十萬而終爲我獲焉帝笑曰
君談過矣是時軍書表記皆爲草具逮東霸城府猶
掌筆翰相府始置仍爲記室參軍事及讓齊王九錫
備物及諸文表皆淹爲之受禪之後又爲驃騎豫章
王記室參軍鎮東武令參掌詔冊並典國史既非雅

好辭不獲命尋遷正員散騎侍郎中書侍郎淹嘗云
人生當適性爲樂安能精意苦力求身後之名哉故
自少及長未嘗著書惟集十卷謂如此足矣重以學
不爲人交不苟合又深信天竺緣果之文偏好老氏
清靜之術仕所望不過諸卿二千石有耕織伏臘之
資則隱矣常願幽居築宇絕棄人事苑以丹林池以
綠水左倚郊甸右帶瀛澤青春爰謝則接武平臯素
秋澄景則獨酌虛室侍姬三四趙女數人不則逍遙
紀彈琴詠詩朝露幾間忽忘老之將至淹之所學
盡此而已矣

尚書殿中曹

廟樂歌詩奏

建元初詔黃門侍郎謝超宗造廟
樂歌詩十二章永明二年尚書殿
中曹奏
詔可

太祖高皇帝廟神室奏高德宣烈之舞未有歌詩郊
應須歌辭穆皇后廟神室亦未有歌辭案傅玄云登
歌廟異其文饗神十室同辭此議爲允又尋漢世歌
篇多少無定皆稱事立文並多八句然後轉韻時有
兩三韻而轉其例甚寡張華夏侯湛亦同前式傅玄
改韻頗數更傷簡節之美近世王韶之顏延之竝四
韻乃轉得賒促之中顏延之謝莊作三廟歌皆各三

文紀
章章八句此於序述功業詳略爲宐今宜依之郊配
之日改降尊作主禮殊宗廟穆后母儀之化事異經
綸此二歌爲一章八句則奏事御奉行

移虜淮陽太守文

永明十年太歲某淮陰太守某移淮陽長大齊承乾
得一清寧今皇上體聖居震纘戎昌緒仁澤之所灑
沾惠風之所偃靡威武之所騰驤刑政之所宣暢浩
浩乎其不可涯涘固能徼岷禺關夷海拓沙渚道零
山八胤承嗣九垓禔福含齒戴髮其樂只且所以通
歡魏境靜息邊民嗟爾黔民共和優泰而魏主不篤

我信誓侮弱我慈懷憑陵我南城寇擾我樊鄧元帥
逞梟鳶之心銳卒蓄蜂蠆之毒蠅飛藩棘蟻附池隍
我聊命偏將執而俘之連左衽于郊門頌編百於我
闕有司將加誅焉天子弗之許也重譔而請天子又
不許也更從請所以置之乃制詔曰昔虞帝欽明苗
山記倒戈之陣夏后踵武鈞臺載不戰之兵今鋒鏑
陵邊彤雲入候加討而後擒待征而知服此乃朕之
涼德彼將何德徒哀其積習爲性因染遂變不識天
時用于人事雖同濱率境自隔王臣直曰斯民獨爲
係虜父母生乖妻兒死別桑梓悠悠墳塋萬里情甚

悲之可解網改祝聽歸巢穴豈直鄰好足鄙特以哀
矜自中以時資遣稱朕意焉已遵明詔部送所虜若
干人即日在界宜速近獲時施故堡使幽荒之外知

皇王之德音故移

文苑英華○彼將何德隣好足鄙下有誤

有司奏氏王楊集始母

除集始母姜氏為太夫人假銀印

集始驅狐翦棘仰化邊服母以子貴宜加榮寵

八座奏陰平王楊炅

進號前將軍並未明中

楊炅嗣勣西牧馳款內昭宜增戎章用輝遐外

芮芮國相邢基祇羅迴

奉高帝表

芮芮國與魏虜世為讐敵太祖輔政嘗遣使芮芮尅期共伐魏及踐阼國

邢基祇羅迴奉表齊亦不能出師

夫四象秉政二儀改度而萬物生焉斯蓋虧盈迭襲

曆數自然也昔晉室將終楚桓竊命寔賴宋武匡濟

之功故能扶危定傾休否以泰祚流九葉而國嗣不

繼今皇天降禍於上宋室猜亂於下臣雖荒遠粗閱

圖書數難以來星文改度房心受變虛危納祉宋滅

齊昌此其驗也水運遘屯木德應運子年垂劉穆之

記嶠嶺有不衽之山京房讖云卯金十六草肅應王

歷觀圖緯休徵非一皆云慶鍾蕭氏代宋者齊會有

使力法度及此國使反採訪聖德彌驗天縱之姿

故能扶隆皇祚光權定之業翼亮天工濟悖主之難
樹勲京師威振海外仗義之功侔蹤湯武冥績既著
寶命因歸受終之曆歸于有道况夫帝無常族有德
必昌時來之數唯靈是與陛下承乾啓之機因乘龍
之運計應符革祚久已踐極荒裔傾戴莫不引領設
未龍飛不宜冲挹上違天人心下垂黎庶之望皇
芮承緒肇自二儀拓土載民地越滄海百代一族大
業天固雖吳漢殊域義同唇齒方欲尅期中原龔行
天罰治兵繕甲俟時大舉振霜戈於并代鳴和鈴於
秦趙掃殄凶醜梟剪元惡然後皇輿遷幸光復中華
仰豈不盛哉

百濟國王牟大

牟慶之孫
牟都之子

上武帝表

南齊書有關南史東夷傳齊末明中
除大都督百濟諸軍事鎮東大將軍

前段

報功勞勤實存名烈假行寧朔將軍臣姐瑾等

四人振竭忠効攘除國難志勇果毅等威名將可謂
扞城固蕃社稷論功料勤宜在甄顯今依例輒假行
職伏願恩愍聽除所假寧朔將軍面中王姐瑾歷贊
時務武功並列今假行冠軍將軍都將軍都漢王建
威將軍八中侯餘古弱冠輔佐忠効夙著今假行寧

朔將軍阿錯王建威將軍餘歷忠欵有素文武列顯
今假行龍驤將軍邁盧王廣武將軍餘固忠効時務
光宣國政今假行建威將軍弗斯侯

又表

臣所遣行建威將軍廣陽太守兼長史臣高達行建
威將軍朝鮮太守兼司馬臣楊茂行宣威將軍兼叅
軍臣會邁等三人志行清亮忠欵夙著往太始中比
使宋朝今任臣使冒涉波險尋其至効宜在進爵謹
依先例各假行職且玄澤靈休萬里所企况親趾矢
庭乃不蒙賴伏願天監特愍除正達邊効夙著勤勞
公務今假行龍驤將軍帶方太守茂志行清壹公務
下廢今建行建威將軍廣陵太守邁執志周密屢致
勤効今假行廣武將軍清河太守

武帝命牟大襲封百濟王策

於戲惟爾世襲忠勤誠著遐表滄路肅澄要貢無替
式循彝典用纂顯命往欽哉其敬膺休命可不慎歟

制詔

制誥行都督百濟諸軍事鎮東大將軍百濟王牟大
今以大襲祖父牟都爲百濟王即位章綬等五銅虎
竹符四王其拜受不亦休乎

上明帝表

年大受封之歲魏虜發騎數十萬攻百濟大遣將沙法名等擊虜軍大敗之建武二年上表請賜軍號詔可○南齊書有缺按此表云去庚午年則受封為武帝之末明八年也

臣自昔受封世被朝榮忝荷節鉞剋攘列辟往姐瑾等並蒙光除臣庶咸泰去庚午年獫狁弗悛舉兵深逼臣遣沙法名等領軍逆討宵襲霆擊匈犁張惶摧崩若海蕩乘奔追斬僵尸丹野由是摧其銳氣鯨暴韜凶今邦宇謐靜實名等之略尋其功勳宜在褒顯今假沙法名行征虜將軍邁羅王贊首流為行安國將軍辟中王解禮昆為行威武將軍弗中侯木干那前有軍功又拔臺舫為行廣威將軍面中侯伏願大恩特愍聽除

又表

臣所遣行龍驤將軍樂浪太守兼長史臣慕遣行建武將軍城陽太守兼司馬臣王茂兼參軍行振武將軍朝鮮太守臣張塞行揚武將軍陳明在官忘私唯公是務見危授命蹈難弗顧今任臣使冒涉波險盡其至誠寔宜進爵各假行署伏願聖朝特賜除正

扶南國王僑陳如闍耶跋摩

姓僑陳如名闍耶跋摩

上武帝表

林邑國西南三千餘里至扶南天竺道人那伽仙附扶南商貨欲歸國遭風至林邑掠其財物皆盡求明二年閻耶跋摩遣那伽仙上表詣京師言其國俗事摩醯首羅天神常降於摩耽山土氣恒暖草木不落詔報之

扶南國王臣僑陳如闍耶跋摩叩頭啓天化撫育感動靈祇四氣調適伏願聖主尊體起居康豫皇太子萬福六宮清休諸王妃主內外朝臣普同和睦隣境士庶萬國歸心五穀豐熟災害不生土清民泰一切安穩臣及人民國土豐樂四氣調和道俗濟濟並蒙陛下光化所被咸荷安泰

又

臣前遣使齎雜物行廣州貨易天竺道人釋那伽仙於廣州因附臣舶欲來扶南海中風漂到林邑國王奪臣貨易并那伽仙私財具陳其從中國來此仰序陛下聖德仁治詳議風化佛法興顯衆僧殷集法事日盛王威嚴整朝望國軌慈愍蒼生八方六合莫不歸伏如聽其所說則化鄰諸天非可爲喻臣聞之下情踊悅若暫奉見尊足仰慕慈恩澤流小國天垂所感率土之民並得皆蒙恩祐是以臣今遣此道人釋那伽仙爲使上表問訊奉貢微獻呈臣等赤心并別陳下情但所獻輕陋愧懼唯深伏願天慈曲照鑒其

其丹款賜不垂責

又

臣有奴名鳩酬羅委臣逃走別在餘處構結凶逆遂破林邑仍自立爲王永不恭從違恩負義叛主之誓天不容載伏尋林邑昔爲檀和之所破久已歸化天威所被四海彌伏而今鳩酬羅守執奴凶自專狼彊且林邑扶南隣界相接親人是臣奴猶尚逆去朝廷遙遠豈復遵舉此國屬陛下故謹具上啓伏聞林邑頃年表獻簡絕便欲求隔朝廷豈有師子坐而安犬鼠伏願遣軍將伐凶逆臣亦自効微誠助朝廷剪撲

使邊海諸國一時歸伏陛下若欲立餘人爲彼王者伏聽敕旨脫未欲灼然與兵伐林邑者伏願特賜勅在所隨宜以少軍助臣乘天之威殄滅小賊伐惡從善平蕩之日上表獻金五婆羅今輕此使送臣丹誠表所陳啓不盡下情謹附那伽仙并其伴口具啓聞伏願愍所啓

天竺道人那伽仙上書

吉祥利世間感攝於羣生所以其然者天感化緣明仙山名摩耽吉樹敷嘉榮摩醯首羅天依此降尊靈國士悉蒙祐人民皆安寧由斯恩被故是以臣歸情

菩薩行忍慈本迹起凡基一發菩提心二乘非所期
歷生積功業六度行大悲勇猛超劫數財命捨無遺
生死不爲厭六道化有緣具修於十地遺果度人天
功業既已定行滿登正覺萬善智圓備惠日照塵俗
衆生感緣應隨機授法藥佛化遍十方無不蒙濟擢
皇帝聖弘道興隆於三寶垂心覽萬機威恩振八表
國土及城邑仁風化清皎亦如釋提洹衆天中最超
陛下臨萬民四海共歸心聖慈流无疆被臣小國深
具摩醯降靈流施彼土雖殊俗異化遙深欣讚知鳩

武帝詔報

酬羅於彼背叛竊據林邑聚兇肆掠殊宜剪討彼雖
介遐陬舊修蕃貢自宋季多難海譯致壅至化惟新
習迷未革朕方以文德來遠人未欲便興干戈王既
欵列忠到遠請軍威今詔交部隨宜應接伐叛柔服
寔惟國典勉立殊効以副所期

會稽刻石山大石文

會稽剡縣刻石山相傳爲
名不知文字所在昇明末

縣民兒襲祖行獵忽見石上
文三處刊苔識之大石文曰

此齊者黃公之化氣也

立石文

黃天星姓蕭字某甲得賢帥天下太平

小石文

刻石者誰會稽南山李斯刻秦望之封也

嵩高山石璽文

璽在其中方
二寸其文曰

戊丁之人與道俱肅然入草應天符

有司奏沸泉木簡文

延陵令戴景度稱所領季子廟舊有涌井二所廟祝
列云舊井北忽聞金石聲即掘深三尺得沸泉其東
忽有聲錚錚又掘得泉沸湧若浪泉中得一銀木簡
長一尺廣二寸隱起文曰廬山道人張陵再拜謁詣

起居簡木堅白而字色黃謹案瑞應圖浪井不鑿自
成王者清靜則仙人主之孔氏世錄云叶精帝道孔
書明巧當在張陵宋均注云張陵佐封禪一云陵仙
人也

璽文

永明二年虜國國民齊祥入靈丘關見山側
有紫氣如雲衆鳥回翔其間獲璽方寸四
分獸鈕師道人惠度覩其文
以衣冠正朔在齊送京師

坤維聖帝永昌

銅獸銘

永明三年越州南高涼俚人
海中網魚獲銅獸一頭銘曰

作寶鼎齊臣萬年子孫承寶



以交民五民王有美京相
公燭珉和齒入惠與賸其文

璽文

有崇康收雲來息回群其間璽文十四
永即二羊囊圖另齊群入靈立關良山

入世

書即已當去刻宋世封云刻刻去挂斬一云刻山
如王春書精似山人主之亦及世驗云扣辭帝齒亦
跋是簡木望白而字台黃蕪案誰惠圖身共不鑿自

